

ՄԱՅՈՒՆ
ԻՆՎԵՑԻԱ

Եղբայրացի

«ՀԱՅԹԱՏԱՆ» ՀՐԱՏԱՐԵԿ ԶՈՒԹՅՈՒՆ ԸՐԵՎԻՆ 1973

«Մեղրահաց» ժողովածուում ամփոփված են Ռազմիկ Ղազոյանի վերջին տարիների այն բանաստեղծությունները, որոնց համար հեղինակն արժանացել է Հայաստանի կոմերիտիության Կենտկոմի 1971 թվականի մրցանակին:

Գրքում զետեղված է նաև Հայրենական պատերազմի ժամանակ թիկունքի կյանքը պատկերող «Խոստովանանք» պոեմը:

99530

Размик Никогосович Давоян

Соты

(На армянском языке)

Издательство «Айастан»

Ереван — 1973

Ես այնպես երիտասարդ եմ, ինչպես ամենագեղեցիկ
ցանկությունն իմ սրտում, և այնպես ծեր, ինչպես իմ կյանքի
բոլոր չիրականացած երազանքները:

(Բուշմենական)

ՏԵՍԻԼՔՆԵՐ

Արորով ինձ հողից հանեցին,
Ինձ հողում ինչո՞վ են թաղելու...
Հոգնել է իմ կյանքի նժույգ-ձին՝
Չի՛ թռչում, չի՛ գնում, չի՛ թռչում՝
Հողմերից երազներ քաղելու:

Չի տենչում ոչ ոքի, ոչ մի բան
Ե՛վ, ափսո՛ս, ոչ մեկին չի կանչում.—
Կյանքը լուռ մեռնում է հավիտյան,
Եվ նրա շիրիմին ոսկեցու
Ոսկեցու տեսիլքն է կանաչում:

Ես վայրի աստղերով զարդարված՝
Ճչում եմ խոսքերով խաթարված,
Որ կյանքը կորչում է անհետ,
Տեսիլքներն ապրում են հավետ,
Տեսիլքներն ապրում են վտարված:

Տեսիլքներ ծաղկում են ամենուր
Ձեռքերում մի անհայտ տրտմության,—
Եվ քիչ-քիչ մեռնում է կյանքն, ավա՛ղ,
Նաս առ մաս տրվում է հողմերին,
Տեսիլքներն ապրում են հավիտյան:

Ապրում են սերունդներ աշխարհում,
Գալի՛ս են, գնո՛ւմ են, ու չկան,
Եվ մեկի համար, որ չգիտենք,
Տեսիլք ու ցնորք ենք հավիտյան:

Մենք մեկի համար, որ չգիտենք,
Տեսիլք ու ցնորք ենք անմեկին,
Գալի՛ս ենք, անցնո՛ւմ ենք, ու չկանք,
Չուկվում ենք հողին ու երկնքին:

Երկինքը տեսիլք է մի անծիր,
Եվ հողը տեսիլք է կորստի,
Աստղերը երգում են անձանծիր,
Որ մեկն իր կարոտը չըսըտի:

Ս Ի Ր Ո Տ Ե Ս Ի Լ Ք Ն Ե Ր

Բաց քո կեղևը, ծառ,
Առ ինձ կեղևիդ մեջ...

Անցան օրեր մեկ-մեկ,
Անցան օրեր զույգ-զույգ,
Ճաշակեցինք և՛ սեր,
Ե՛վ տառապանք, և՛ սուգ:

Հոգնեցրին ինձ արդեն
Օրերը լայն ու նեղ,
Հոգնեցրին ինձ արդեն
Մեղավոր ու անմեղ,
Հոգնեցրին ինձ արդեն
Տխրությունն այս ցանցառ
Եվ կարոտներն այս խեղճ,
Դե բաց կեղևդ, ծա՛ռ,
Ա՛ռ ինձ կեղևիդ մեջ:

Ա՛ռ ինձ կեղևիդ մեջ.—
Այս անծաղիկ դարում

Ես կծուլվեմ քեզ հետ՝
Որպես փոքրիկ գարուն:

Որպես թաքուն թախիծ,
Տերևներիդ խորքում
Ես կփայլեմ տխուր
Ու կմտնեմ խոր քուն:

Ու հողմերը թե գան՝
Ինձ խլեն քո ձեռքից,
Ես կարթնանամ, ծա՛ռ իմ.
Կըրրոտանք մեկից:

Ես կծգվեմ քեզ հետ,
Ես կճկվեմ քեզ հետ
Ու հողմերի ձեռքից
Ես կփրկվեմ քեզ հետ:

Ու մի թաքուն գիշեր,⁷
Երբ բուրբ քնեն,
Ես քեզ կախարդական
Բառեր կըկրկընեմ,

Կելնենք թաքուն-թաքո՛ւն,
Կերթանք կամաց-կամա՛ց
Ու քնի մեջ նրան
Կդարձընենք անքուն:

Նրա երազի մեջ
Կախարդական մի ծառ
Մարդկային ձև կառնի,—
Կշնկշնկա կամաց
Եվ մարդկային լեզվով,
Որպես լեզենդ պայծառ,
Կբարբառի նրան
ԱՆհո՛ւն, կորած մի սեր
Եվ մի կարոտ անծայր:

Հետո կամաց-կամաց,
Ցավով մեր շողշողուն,
Որպես կորած տեսիլք,
Մենք կթաղվենք հողում:

Չկա՛,
Չի՛ լինի,
Էլ չի՛ լինելու
Իմ սիրո համար
Հին ոգեշնչման տանջանքը անսուտ:
Ուրիշ մի սեր է թաքտում հիմա
Իմ կորած սիրո կորստյան համար:—
Սակայն օրերս էլ չեմ դարձնելու
Տառապանք ու սուգ՝
Ինքնապաշտպանման փշերը վրան.—
Ես հնարել եմ մի գետ՝ Արտասուք,
Եվ վախենում եմ կորցընեմ նրան:

Ես հնարել եմ մի գետ — Արտասուք—
Եվ վախենում եմ կորցընեմ նրան,
Իմ գետի վրա դողանջում է լուռ
Իմ հին օրերի ցուքը հուրհրան,
Գետիս ափերին թավշե հիփիկներ
Սրոր են ասում բույրով անանուն,
Գետիս ափերին ոսկե իլիկներ
Երգերիս համար
Ծաղկաթերթերից

Թելեր են մանում —

Իմ գետը այսպես գնում հանդարտիկ,
Ինքն իր հետ անգամ չի ուզում խոսել:
Գետիս ափերին շրջում են մարդիկ
Եվ արարում են տառապանք ու սեր:
Եվ աղերսում են փրկության լույսեր,
Եվ երազում են ցոլքը աստղերի,
Եվ ծաղկեցնում են անծաղիկ հույսեր,
Որ իրենց ցավին ամոքում բերի:

Անծաղիկ հույսեր, անծաղիկ երազ,
Եվ համատարած ծաղկած լոռություն,—
Իմ գետը այսպես գնում հանդարտիկ,
Գնում է դեպի անսահմանություն:

Իմ գետի խորքում իմ աչքերը զույգ
Սիրո մարգարիտ փնտրելով կորան,—
Ես արարել եմ մի գետ — Արտասուք —
Եվ վախենում եմ կորցընեմ նրան:

Ոչինչ չի լինում աշխարհում այնպես,
Ինչպես որ գետը մենավոր ու ծուլ,
Ինքն իր հառաչից խլացածի պես
Անվերջ քերում է իր ափերը ծուռ:

Աննկատ ցավով քերում է անվերջ
Անհավատալի մի մեծ տրտմություն.—
Անհայտ ճամփեքով, անանուն մի գետ
Գնում է դեպի անսահմանություն:

Ինչպես արևի շողը բռնելով,
 Կենդանանում է թրթուրը քնած
 Եվ խլրտում է տաքուկ փոշու մեջ,
 Այդպես Հանճարի ճառագայթի տակ
 Արթնանում Բառը
 Եվ տաք խլիրտով
 Շարժվում է դեպի հավիտենություն:

Ջգացմունքների խեղդվող ալիքից
 Բառն ինքը, ահա,
 Խոստովանանքի համար է ծնվում,
 Ու թեև նրան մանրում են մարդիկ
 Շահատակության շուկաների մեջ,
 Սակայն ինչ-որ տեղ՝
 Հոգու ծալքերում իմաստունների,
 Ապրում է Բառը և անվերջ թրժվում:

Հավատամքը — Սեր,
 Տառապանքը — Սեր...

Ես նստել էի
 Բառի մենավոր քարանձավի մեջ,

Եվ Բառը հազար տխուր աչքերով
Լալիս էր վրաս.—

Ես չգիտեի,

Որ դու մոմերդ կվառես մի օր՝
Բառի խորքերը լուսավորելու,
Եվ լուռության մեջ կթողնես, գնաս:
Ես չգիտեի...

Եվ Բառը հիմա քայլում է հոգնած
Բառերի անծայր քարավանի մեջ,
Ե՛վ տխուր է նա, ձանձրացած մի քիչ
Ե՛վ աննվաճ է, և՛ քնքշորեն խեղճ:

Եվ ինձ թվում է՝ նրա ստվերը

Բոլոր կողմերից

Քշում են վայրի ուրուրներ հազար.—

Գիշակերների, անտաղանդների ստրուկն է

Բառը,

Նա Հանճարին է միայն հավասար:

Եվ քանի դու կաս, ամեն գարնան հետ,

Ինչպես արևի շողը բռնելով

Կենդանանում է թրթուրը քնած,

Եվ խլրտում է տաքուկ փոշու մեջ,

Այդպես Կարոտիս ճառագայթի տակ

Արթնանում Բառը

Եվ տաք խլիրտով

Շարժվում է դեպի հավիտենություն:

●

Զրերը կակաչներ են ուտում,
Խոհերը քանդվում են գուղձերով.
Անցնում են քամիներ կապույտ՝
Հուշերի տագնապներ հնձելով:

Մանուկներն՝ աչքերում թիթեռներ,
Ծաղկավոր ցուլեր են քշում դաշտ,
Բզեզներն արթուն են ամեն օր,
Գազաթներն հավքեր են ձյունապաշտ:

Անանուն ցավերի ճամփորդներ՝
Զրերը կակաչներ են ուտում.—
Գիշերով մենք սերը կորցրինք,
Ցերեկով փնտրում ու չենք գտնում:

●
Նա իմ հոգու անծայր տափաստանում պարող
Կապույտ վրան.—

Մեկն իր փոքրիկ ձեռքով խարույկներ էր բռնում
Կայծկտացող բոցեր,
Ու նվիրում նրան:

Օ Մորիկի պես հանկարծ կանաչ փեշը բացում
Վրնջում էր վայրի,
Նա ոչ աստված ուներ,
Ոչ տիրակա՛լ, ոչ ձև՛,
Ինքը՝ բնությունն էր՝ ազատ-որբևայրի:

Նա մեծ ճառագայթի մի գալարվող բեկոր,
Մի մեծ ազատության փոքրիկ վրան.—
Բոցեր էի բռնում ես իմ փոքրիկ ձեռքով,
Կայծկտացող խարույկ, ու նվիրում նրան:

Մորիկի պես հանկարծ կանաչ փեշը բացում,
Վրնջում էր վայրի,
Նա ոչ աստված ուներ,
Ոչ տիրակա՛լ, ոչ ձև՛,
Ինքը՝ բնությունն էր՝ ազատ-որբևայրի:

•

Նրա կողքին մի հին ջութակ էր լուռ ընկած,
Եվ երկնքից լուսինն աղեղն իր սպիտակ
Ջգույշ ու մեղմորեն քսում էր ջութակին,
Եվ խեղճը մանկորեն դողում էր լուսնի տակ:

Ձայնը բոցի նման գալարվում էր հանկարծ
Հետո ծիւի նման ձգվում էր վեր
Հետո հողմի նման խառնվում էր ամպած՝
Ջնգզնգալով հեռու կարոտ ու սեր:

Ձայնը խաժ էր, խաժակ, խաժ արտասուք,
Խաժ արտերի խշշուն օրոր-շորոր.—
Ախ, այդ ձա՛յն էր, թե մութ պնդայտներից թռած
Արծաթացուք ասուպ.—
Ախ, այդ ձա՛յն էր, թե մեզ նոր մի ցավի համար
Այցելության եկած
Կարոտները մեր տաք, երազները մեր սուտ:

•

●

Ռ ու կա՛ս, հիմա դու կա՛ս,
Ես ճանաչում եմ քեզ,
Եվ թողնում եմ, որ իմ
Աչքերի մեջ երգես,
Եվ թողնում եմ, որ իմ
Շրթունքներով ճչաս,
Եվ թողնում եմ, որ ինձ
Ճանաչես ու խղճաս:
Եվ թողնում եմ, որ ինձ
Դու վերստին երկնես,
Եվ թողնում եմ, որ ինձ
Բառերի փունջ մեկնես:

Քեզ ամեն ինչ այդպես
Թույլ եմ տալիս, սե՛ր իմ,
Քեզնով ես ինքս ինձ
Բույր եմ տալիս, սե՛ր իմ:

Բույր եմ տալիս ես ինձ,
Քեզնով գույն եմ տալիս,
Իմ մեջ աշխարհն ամբողջ
Շուտումուտ եմ տալիս

Եվ քո հուշի դիմաց
Ես պեծկտում եմ դեռ,
Ինչպես թաց մթի մեջ
Հանգչող լապտեր:

Ոչինչ չեմ հասկանում տագնապներից սրտիս,
Սրտիս թրթիռներից ոչինչ չեմ հասկանում,
Մեկ նայում եմ ծովի տրտմությանը փափուկ,
Մեկ լսում եմ ծովից վերադարձող քամուն.
Եվ իմ սրտից, սրտիս տագնապներից անմիտ
Ոչինչ չեմ հասկանո՛ւմ, ոչինչ չեմ հասկանո՛ւմ:

Իմ ուղեղի անծայր միրաժի մեջ ընկած,
Հստակ պատկերների իմացությամբ անզոր,
Կույր աշխարհի հզոր անեզրության առաջ
Ես՝ անհեթե՛թ, անմի՛տ, տառապում եմ այսօր—
Էլ ո՞վ արդյոք ինձ նոր երազանքներ կտա՝
Իմ աննշմար աստղի ճառագայթին հասնող:

Ո՞վ կտա ինձ, էլ ո՞վ...
Ինքս ինձ օրորելով,
Քնեցնում եմ ծովի կապույտի մեջ անծիր,
Եվ ես՝ կարոտների մի մանրամաղ թանձիվ,
Ես ալիքից ալիք թռչկոտում եմ հերթով՝
Ինձ քարշ տալով լուսնի խոնավ արահետով:

Ոչինչ չեմ հասկանում տագնապներից սրտիս,
Ոչինչ չեմ հասկանում.—

Սե՛ր իմ, քո անունը վրաս սարսուղների
Ոսկեդեղին մշուշ — մղեղներ է մանում,
Սե՛ր իմ, քո աչքերը իմ չարչարված հոգուց
Համր թռչունների երամներ են հանում,
Նրանք ճայերի պես ալիքներիս միջից
Կարոտներիս ոսկե ձկնիկները մեկ-մեկ
Կտցում են ու տանում:

Ո՛ւր են տանում, սակայն, սե՛ր իմ, ո՛ւր են տանում,
Ո՛ւր կարող են տանել,
Երբ ամեն ինչ հիմա ամուր շղթաներով
Բանտված է իմ հոգու մութ զնդանում,
Երբ ամեն մի թողած հառաչանքիս դիմաց
Հազար արձագանք են ետ ստանում:

Եվ ես հիմա նստած այս հեռավոր ափին,
Ղրիմյան այս այրված ու ձանձրալի հեռվում,
Խրախճանքի ելած ամբոխների միջով
Քո հեռավոր ու պարզ տեսիլքին եմ մերվում:

Եվ շողի պես խոնավ շրթունքներիդ վրա
Պսակում եմ բառերն անմեկնելի լույսով,
Եվ ապրում եմ այսպես՝ անհեթեթ ու անմիտ՝
Ինչ-որ դատարկ մի օր էլ չապրելու հույզով:

Ես ամեն օր քեզ հետ զրուցում եմ թաքուն
Եվ ամեն օր քեզ հետ կռիվ ու վեճ ունեմ,
Եվ ամեն օր այսպես տառապում եմ, սե՛ր իմ,
Զե՛ որ մտածում եմ, որ ես էլ վերջ ունեմ:

Անբնական մի վերջ՝ հիմար մի տագնապից,
Հիմար մի տագնապի անբնական չափից,
Իմ ու այս աշխարհի անբնական կապից,
Ամեն կողմից գլխիս,
Երազներիս թափվող
Անմարդկային ցավից, անմարդկային լափից:

Անբնական մի վերջ, սե՛ր իմ, անբնական.—

Դու, որ կարող էիր թավշե մի ժպիտով
Բոցավառել իմ գորշ ու տաղտկալի ներկան
Եվ որ կարող էիր գուրգուրանքի ստով
Լցնել իմ մեջ կյանքի ուժը տիտանական,—
Դու հեռացար այնպես փափուկ ու բնական,
Այնպես անփութորեն և մտերիմ այնքան,
Այնքան մտերմորեն— և՛ լուռ, և՛ անհուզում,
Որ ես հիմա ցավից խորտակվել եմ ուզում:

Մի՛ տագնապիր, մի՛ լար և մի՛ ասա, թե դու
Հետո ճամփաներ ես փնտրել վերադարձի,
Իսկ դու գիտե՛ս՝ ի՛նչ է ցավը խորտակվածի,
Եվ կորուստը արդեն կորուստ տված մարդու:

Պիտի ելնեմ հիմա, մառախուղի միջով
Պիտի գնամ ինչ-որ անհայտ ճամփորդության,
Եվ դա չի լինելու խոռվածի տագնապ.
Կամ միամիտ մարդու քմայք անփորձության:

Պիտի գնամ, ի՛նչ կա: Դու ել պիտի գնաս,
~~Որպես փափուկ մշուշ,~~ կամ կարոտի մի հով,
Պիտի գնաս մենա՛կ, անվերադա՛րձ, անփո՛ւյթ,
Սակայն, ավադ. ուրի՛շ,
Ուրի՛շ ճանապարհով:

Լիալուսնի նման մաքուր և սպիտակ,
 Լիալուսնի նման կապույտի մեջ դրված,
 Շուրջը հազար գույնի ծաղկող աստղավարդեր,
 Շուրջը հազար խոհի ալիքներ են փլված...
 Այսպես ծովն է կապույտ,
 Եվ սեղանն է ճերմակ,
 Աղի բյուրեղներն են շողում անփույթ,
 Եվ մատներով իր պաղ
 Պատառաքաղն ահա ափսեն է ճանկոտում.—
 Ես այստեղ չե՛մ հիմա,
 Ես այստեղ չե՛մ հիմա —
 Ես ինձ փչեմ հիմա՝
 Խլածաղկի նման կփշրվեմ օդում:

Աննյութեղեն, անցավ, ճառագայթի նման,
 Ինչպես առու բացես փոքրիկ ամբարտակից.
 Միտքըս ինձ այստեղից, առանց որ զգայի,
 Ինձ ծայրեծայր քշեց, տարավ իմ հատակից:

Շուրջս հազար գույնի ծաղկող աստղավարդեր,
 Շուրջս հազար խոհի ալիքներ են փլված,
 Լիալուսնի նման մաքուր և սպիտակ
 Իմ դեմ ահա կլոր մի սեղան է դրված:

Ես նայում եմ, գիտեմ,
Ու ես չկամ հիմա,
Ուզում եմ լաց լինել,
Բայց զգում եմ, որ՝ չէ,
Մոլոր ուլի նման .
Կըմկկամ հիմա,
Կբառաչեմ ցավից.
Սակայն ցավը չկա,
- Առանց ակունք, անցավ, արցունքն էլ որտեղի՞ց,
Էլ որտեղի՞ց կգա:

Ուզում եմ լաց լինել,
Ու խշշում եմ կամաց,
Խշխշում եմ աշնան խաշամի պես,
Ինչպես...
Ավա՛ղ, խշխշում է սիրտը քամած:

Քո ձեռքի մեջ քամած,
Քո ձեռքերով քամած.—
Այդ «Քո» հիշողության հայտնության դեմ ահա
Ես մնում եմ անզոր, լուռ, կարկամած:
Ու նստած եմ թեև,
Թեև պաղ մատներով
Պատառաքաղն ահա ավսեն է ճանկոտտում,
Բայց այստեղ չեմ հիմա,
Ես այստեղ չեմ հիմա,
Ես ինձ փչեմ հիմա՝
Խլածաղկի նման կանհետանամ օդում:

Կնքված է իմ կյանքը
Երազներով ոսկե,
Ոսկե տազնապներով ու տանջանքով,
Կնքված է իմ կյանքը
Ինձ լույս աշխարհ բերող
Ճիշ ու հառաչանքով:

Եվ քանի դեռ կյանքը
Քո արարմամբ ոսկե
Խենթացնում է դեռ մեզ.—
Ես մնում եմ ճամփիդ
Կախված անտուն կարոտ,
Եվ չեմ ճշում ու չեմ հառաչում ես:

Ես իմ մանկության հանդերին կանաչ,
Ծառ ու ծաղկունքին խող շնջալով
Ասում էի, թե՛ սեր կբերեմ ձեզ,
Եվ կրծքիս խորքում . . .
Բառերը անուշ զնգզնգում էին
Հեռո՛ւ— հեռավոր ճամփա գնացող
Խոլ նժույգների զանգակների պես:

Ես ասում էի՝ սեր կբերեմ ձեզ,
Կբերեմ, որքան աշխարհն ունենա.—
Խոտերն անշուկ խոնարհվում էին,
Եվ ծաղիկները ժպտում էին լուռ,
Եվ ջրերն իրենց տագնապները հին
Անրջանք էին դարձնում մաքուր:

Ես ասում էի՝ սեր կբերեմ ձեզ,
Եվ թիթեռները մեղմ երանությամբ
Համբուրում էին խոտերը դալար,
Եվ թռչունները ոսկե կտուցով
Ջուր էին բերում
Իրենց սիրասուն ձագերի համար:

•
Հետո անձրևներ եկան դառնաղի.—
Բարձր շենքերի խուլ պատերի տակ
Կծկվեց ցրտից տրտմությունն իմ խեղճ,
— Սերն ի՞նչ էր անում, սերն ո՞ւր էր արդյոք.—
Ու լացեց սիրտս հորդաբուխ ու տաք
Իմ պատառոտված կոշիկների մեջ:

Լացեց, ու թեև հեռու հանդերում
Խոտերը վշտից սև չկապեցին,
Բայց նրանց երգը գուցե թե տխրեց,
Թե մարդիկ ահա դարձյալ խաբեցին:

Ես նրանց արդյոք ի՞նչ պիտի ասեմ,
Ի՞նչ պիտի ասի աշխարհն այս թերի,
Երբ ջրերն իրենց անրջանքը սուտ
Վերափոխել են հին տազնապների:

Սուտ էր տառապանքն իմ համր ու թաքուն,
Սուտ էին բոլոր երազներս խեղճ,
Սուտ էին բոլոր գիշերներս անքուն՝
Սև-սև նիզակներ՝
Մխրճված իմ մեծ երջանկության մեջ:

Սուտ էր հայացքիդ տրտմությունն անքող,
Եվ կարոտներիս տագնապն անանուն,
Ճերմակ ձեռքերիդ սրսփումը խուլ,
Եվ շրթունքներիդ մրմունջներն անհուն:

Սուտ էին: Չկար: Ու չէին եղել,
Ա՛խ, միթե՞ սուտ էր ամեն ինչ, սե՛ր իմ,
Մի՞թե հավիտյան տանջանքը բյուրոց
Դամբան է դառնում նրանց հույսերին:

Աշխարհում միլիոն ստեր կան, որոնց
Հարկավոր են ճիշտ բույն ու օրորոց:

Ցավը խնդության դռներն է բախում
Եվ բույն է դնում երջանկության մեջ,

Նրա սաղմերը աշխարհ են փոխում,
Ապականելով մեր բախտը անվերջ:

Աշխարհում միլիոն սուտ ցավեր, որոնց
Հարկավոր են ճիշտ բույն ու օրորոց:

Սուտն ամեն վայրկյան հետևում է, որ
Ճշմարտությունը իրեն օրորի.—
Ճշմարտությունը՝ մի վայրկյան, մի օր,
Հավերժ ու ճիշտ է սուտը բոլորի:

Եվ ցավ պատճառող այդ ստի տակից
Ճշմարտությունն է ցավի պես ծաղկում.—
Սուտ էին բոլոր տագնապներս անքեն,
Սուտ էին բոլոր գիշերներս անքուն:

Մոռացման քանի՛ պատճեն կա մեր մեջ,
Որ դու ես դրել,
Որ տրտմության ու կարոտի ճամփով
Նորից ետ չգաս.—

Պատճեն եմ, այո՛,
Բայց բոլորն այնքան մոտ ու մտերիմ,
Եվ մեռնելու չափ թափանցիկ ու պարզ,
Որ ես չգիտեմ՝ պատճեն՞ եմ դրանք,
Թե՛ կախարդանքի օղակներ ու խազ,
Ես սովորական տառապո՞ղ եմ մի,
Թե՛ տառապանքի քավության նոխազ:

Եվ ահա քեզ հետ խոսում եմ երկար,
Դու ոչ մի բառիս չես պատասխանում,
Բառերը օդում կախվում են խեղդված
Պատճենների ձուլլ անդորրության մեջ,
Եվ դարձյալ ես քեզ կանչո՞ւմ եմ, կանչո՞ւմ...
Ի՞նչ անեմ, սե՛ր իմ, խզվել է ձայնս
Եվ կոկորդիս մեջ
Անապատների փշերն են աճում,
Եվ ողնաշարս նոճվում է ծանր
Ուղտերի հեռու քարավանի պես.—

Աչքերս խոնավ անձկությամբ ճալի
Փոթորիկների ոգին են կանչում,
Որ գան ու սրբեն անապատս ինձնից՝
Իմ ավազներին կեր չդառնամ ես.— ✦

Եվ սակայն նորից իմ դեմ կանգնում է
Մեր փոքրի՛կ, փոքրի՛կ հավիտենության
Վայրկյանը վերջին,
Եվ ես հանգչողի խուլ հանդարտությամբ
Ականջ եմ դնում
Նշենիների բողբոջման շնչին,
Ծաղկում են բույր նշենիները,
Բալենիները հրավառվում են
Աղավնափետուր կայծկլտումներով,
Եվ կակաչները բռնկվում են հիբ
Ու ողջ աշխարհը լցնում են բույրով:

Եվ ինձ թվում է՝ ուր որ է, ահա,
Պատնեշներ ծակող
Քո ուրախության ճիչը կլսեմ,
Բայց այդ վայրկյանին խլանում եմ ես,
Եվ չքանում է պատրանքը վսեմ:

Եվ չքանում է ողջը, ինչ որ կար,
Ինչ որ եղել էր ճիշտ չեղածի պես,
Իմ կոկորդի մեջ անհուն և անվերջ
Անապատների փշերն են աճում,
Եվ քո դառնությամբ բզկտվում եմ ես
Այս համատարած անդորրության մեջ:

Զայները գուցե չեն մեռնում բնավ,
 Զայները գուցե բարձրանում են վեր,
 Մանուկների պես
 Խաղում են փափուկ ամպերի վրա,
 Հետո դառնում են աստղային հովեր:
 Եվ ազատվելով մարդու կապանքից,
 Երջանկանում են տխուր հրճվանքով,
 Մարդն ազատվում է իր տառապանքից,
 Եվ տիեզերքը լցվում է կյանքով:

Զայները գուցե չեն մեռնում բնավ,
 Գուցե պահվում են ջրերի խորքում,
 Գուցե մտնում են խեցիների մեջ
 Մարգարտանալու տենչանքով զնգուն:
 Եվ կախարդական ձկների տեսքով
 Գուցե աշխարհ են գալիս վերստին,
 Ապրում են դարձյալ, կորչում են դարձյալ՝
 Կյանք տալով այս նոր խաբկանքին, ստին:

Եթե ձայները չեն մեռնում բնավ
 Ապրում են ու դեռ

Ապրելու տենչ են տալիս օրերին,
Հազար օրհնութիւն, հազար երանի՛
Եղեգների մեջ հնչող ձայներին:
Հազար օրհնութիւն, հազար երանի՛
Շուշանների մեջ շնչող ձայներին,
Եվ հազար թախի՛ծ ու հազար տագնա՛ւ
Գուժկանների մեջ ննջող ձայներին:

Եվ քանի որ դու շուշան ես կապույտ
Եվ քանի որ դու եղեգ ես, օ՛, քույր,
Եվ եթե ես ձայն ունեմ ապրելու
Թող քո մեջ զնգա իմ ձայնը մաքուր:
Թող քո մեջ ննջի, քո մեջ շնկշնկա,
Թող քեզ աստղային հովերով լցնի,
Գուցե մոլորվի, գուցե հեկեկա՝
Թե մեկը քեզնից հառաչանք փրցնի:

Ձայները գուցե չեն մեռնում բնավ,
Ձայները գուցե ծաղկում են անվերջ,
Երբ մենք բոլորս ձայնել ենք արդեն
Տիեզերական խաղաղության մեջ:
Ձայնել ենք և էլ ոչ մեկս չկանք,
Եվ ողջ աշխարհը դարձել է ահա
Ավեր ձայների ծաղկավառ մի գորգ.—

Թեև ձայները չեն մեռնում բնավ,
Բայց նրանց կյանքն էլ ակնթարթ է լոկ:

Միակ սարսափն ահա,
Որ այս քանի տարի շրջում է իմ ետևից,
Իմ մեծ սերն է, որին
Չեմ ասել՝ մի արի,
Բայց և միշտ սպասել եմ,
Որ՝ ուր որ է, հիմա
Ինձ իր անջն դրած սև թիրախի նման
Ցրիվ-ցրիվ կանի:

Սե՛ր իմ, դու տեսե՛լ ես, թե ինչպես է շունչը
Ցրվում խավարի մեջ.—
Այդպես կարող եմ ես
Մի վայրկյանում ցնդել,
Այդպես կարող եմ ես
Անէանալ, կորչել,
Ցավին ու սարսափին այս անընտել՝
Կարող եմ ես հանկարծ
Ինքս իմ երազներից, կյանքից, կարոտներից
Դառնանալ ու քոչել:

Սե՛ր իմ, դրա համար
Ես փախչում եմ հիմա,

Եվ շուտ գալուց դողում,
Ամաչում եմ հիմա:
Բայց փախչում եմ այնպես,
Ինչպես որ մշուշն է փախչում արոտներից,
Պահվում քերծ ու ձորում,
Հետո արցունք դարձած —
Կաթի՛լ-կաթի՛լ-կաթի՛լ
Ժայռերն ի վար ծորում: .

Հետո գետի նման
Փախչում եմ անարգել,
Փախչում եմ ու փախչում,
Բայց գետն ո՛ւր կփախչի,
Եթե ակունքը կա
Ու դեռ չի ցամաքել:

Ես պահվում եմ անվերջ
Իմ մութ քարայրներում,
Հոգուս մութ խորշերի մեջ
Ես փակվում եմ մեռակ,
Որ ապրեմ լուռ, անտես,
Իմ ցավերով անդեղ,
Իսկ դու ամեն անգամ
Ինձ լույս աշխարհ հանում,
Ինձ պատժում ես, սե՛ր իմ
Գլխիս վերև կախված
Հավերժական կանթեղ:

Կա հին մի տուն,
Որ միշտ ծխում է երազիս մեջ
Եվ կա մի ծառ,
Որից
Թռչում են երազներում:
Եվ չեն կաչում հողին,
Թեև ես չեմ թևում:
Եվ կա մի դաշտ,
Որի
Ծաղիկների գլխով,
Ծառից թռչելուց ետ,
Ես սահում եմ թեթև հովի նման,
Եվ կա մի գետ,
Որ ապրում է, ահա, արդեն քանի՛ տարի,
Իր ծիծաղկուն ոսկե ձկների հետ,
Եվ չի կանգնում երբեք
Ոչ ձկների հոսքը, ոչ էլ գետի,
Եվ կա, այդպես, փոքրիկ մի արահետ,
Որ նման է դեղին ժապավենի՞, լաթի՞...
Ես այդ արահետով
Թռչում եմ շատ երկար,

Որ ակունքը գտնեմ
Այդ ոսկեղեն ձկներ բերող գետի:

Ահա, տունն ինձ երբեք
Չի պարգևել հանգիստ,
Եվ չի տվել ծառն ինձ
Պտուղն իր ճյուղերի,
Թե՛ն ծաղիկները
Դուր են եկել ինձ խիստ,
Սակայն ձեռքս նրանց
Չի հասել միշտ էլի:
Գետը չի լվացել
Փոշին իմ ոտքերի,
Եվ չեն խոսել ինձ հետ
Կախարդական, ոսկե
Ձկնիկները հեռվի:
Բայց լուռ երջանկությամբ
Արթնացել եմ ես միշտ,
Որ հավատամ թեկուզ ինձ բախտ չշնորհող,
Բայց իմ բախտը ոսկե խաբկանքներով պատող
Գոյությանը նրա,
Եվ գտել եմ ինձ միշտ
Անօգնական, ծա՛նր, ծանրամարմի՛ն
Հոգսերի ու ցավի հողի վրա:

Եվ ահա քեզ, սե՛ր իմ,
Ես ի՞նչ խոսքով ասեմ,
Ինչպե՛ս ասեմ հիմա,
Որ քո խաբկանքներից

Արթնանալը այսօր
Կդառնա ինձ համար
Քաղցը՛ր, փաղաքշո՛ղ,
Գուրգուրող մահ:

●

Չայնդ՝ անհունի կապույտ մի ծվեն,
Փովում էր իմ մեջ անսահմանությամբ
Եվ ինքն իրենից աստղեր էր ձուլում,
Եվ ինքն իրենից ձուլում էր զանգեր՝
Որ լցված էին
Մի ոսկի՛, ոսկի՛, ոսկի՛ տանջանքի
Խուլ ղողանջներով:

Քո ձայնն իմ մեջ էր լցնում աշխարհի
Հավքերին բոլոր,
Որ պարզ աստղերի զնգզնգոցի պես
Ղողանջում էին,—
Երբ վարագույրը իջեցրին հանդարտ
Պատկերիդ վրա,
Քո ձայնն իմ միջից վտարեց բոլոր
Թևավորներին:

Հիմա ես էլ չեմ կանչում աստղերին,
Անցնում եմ մեկ-մեկ տարիներս խորթ,
Այդ ոչինչ, որ ես խլացա, սեր իմ,
Թևավորներս մնացել են որբ: .

●

Ի սկ ես, մշուշներում քնած փոքրիկ մանուկ,
Անօգնակա՛ն, անզե՛ն: Մենակության վախից
Տեսնում էի միայն մատները քո երկար,
Եվ իջնում էր վրաս ասպատակող թախիծ:

Լսում էի միայն արձագանքդ հեռու,
Որ փշրում էր տխուր աղաչանքս խաչե.
Սակայն աշխարհով մեկ փռված կրակներիս
Կայծերն հիմա շուրջդ սաղմոսներ են երգում.—
Սե՛ր իմ, վերջիվերջո, հավատ կա, չէ՛:

●

Առավոտը հանդարտ սար ու ձոր էր լցվում.
Մուժը քլթքլթում էր մատների տակ նրա.—
Ճերմակ ժանյակներով կապույտ ցողի նման
Նստել էիր փոքրիկ կոճղի վրա:

Ո՛ր գնայի, աստված, ո՛ր փնտրեի ես քեզ՝
Այդքան մաքուր ու նեղ, այդքան չար ու բարի:—
Ճերմակ ժանյակների արծակեցի մեկ-մեկ,
Ձեռքդ առաջ բերիր և ասացիր՝ արի:

Մոտեցիր ինձ, ասիր, շոյիր ցողը կապույտ,
Ինչ որ հասնում է քեզ, առ ու գնա.—

Ու ես փախա հետո, ու չքացա հետո,
Ու գնում եմ այդպես մինչև հիմա:

Մեղավոր էր հողը, որ կարծրացավ հանկարծ,
Ոտքի վրա հանգան
Արմատներով իրար տրտմությունը փնտրող
Երկու երգեր...

Այդ ի՞նչպես են փոխել
Մեզ տարիներն անքուն,
Որ համրացել են ես,
Իսկ քո ողնաշարով սահող արևներից
Քո աչքերի խորքում,
Ծրթունքներիդ վրա
Կակաչներ են ծաղկում:

Սերըդ խեղդում էր ինձ. սերըդ խեղդում էր ինձ—
ես թափվում էի անտեղ, անտուն,
Խուլ հառաչում էի տառապանք ու ցավից,
Ինքս արցունքների հեղեղ էի խեղդում:

Հետո տարան, ավա՛ղ, ինձ առան ու տարան
Որդեգրված որբի, տանջանքի պես,
Հիմա սերդ կրկին խեղդում է ինձ, սե՛ր իմ,
Եվ ես կամաց-կամաց խեղդվում եմ, տե՛ս:

●

Լիլիան աղջիկ է մի փոքրիկ,
Լիլիան ունի ձեռքեր կաթի,
Կայծկլտում է խարույկի պես
Սշուշների մեջ հեքիաթի:

Ծիծաղում է ամպերի մեջ
Ջրնգոցով աստեղնային.
Ու ծաղկում են աչքերի մեջ
Հին դարերի սերերը հին:

Լիլիան աղջիկ է մի փոքրիկ,
Լիլիան ունի բառեր սաթե,
Իմ աճյունի վրա փոված
Լիլիան մշուշ է արծաթե:

Ճ երմակ բարձերի խլության մեջ
Խուլ տկտկում է սիրտս վախից.—
— Քեզ ո՞վ է տվել այդքան տագնապ,
— Քեզ ո՞վ է տվել այդքան թախիծ:

Քեզ ո՞վ անիծեց՝ անհունի մեջ
Ցավի ձեռքերը գուրգուրելու,
Եվ նրա առջև ծունկի եկած
Հառաչելու և աղոթելու:

Քեզ ո՞վ օրհնեց, որ ցավը հավետ
Քո լույս ձեռքերը արյունոտի,
Որ դու չթողնես նրան հանկարծ,
Որ զորանալով, մեծանալով
Նա քո մարմինն էլ պատառոտի:

Ի՞նչ ես թողել դու, ի՞նչ երազներ,
Ի՞նչ կարոտների, ցավերի բերդ.—
Ո՞վ է կանչում քեզ, ո՞վ է կանչում,
Որ տարրալուծի անհունի հետ:

Նա՛, որ արցունքիդ քողը հագավ
Ու քո աչքերի մշուշը հեզ, /
Եվ հեռացավ ու... և հեռացավ
Ճիշտ երագի և սուտ աստղի պես:

Յուրտ ու մտերիմ աշխարհում այս հին
ես կարոտում եմ մատներին քո թույլ,
Հին երազներ են շուրջս թափառում,
Ու հին կարոտներ ծաղկում են բույլ-բույլ:

Եվ այս աշխարհի խարխուլ ու դատարկ,
Յուրտ միջանցքներով անցնում է քամին,
Վարագույրները խուլ սրթսրթալով
Վախից կպչում են պատուհաններին:

Ինչքան որ կա սեր
Աշխարհում այս հին
Բոլորը անդարձ
Տրվել են մահին:

Ու մահվան ձեռքում
Նստել ենք սաստված՝
Դու՝ փոքրիկ աղջիկ
Ես՝ մի մեղկ աստված:

●

Քո լռությունը՝ հեռու և մոտիկ
Ճերմակ շուշաններ կդարձնեն ես,
Եվ քո մազերի փափուկ թախիծով
Կլցնեն կյանքս տրուբադուրի պես:

Կլցնեն, կերթամ, կըերգեմ անվերջ
Ճանապարհների փոշիները տաք:—
Իմ սև լռություն, ողջ կյանքս պիտի
Խեղճ Պետրարկայի սոնետների պես
Այրեն քո փխրուն ոտիկների տակ:

•

.

●
Լուում եմ.

Ձայնս երկինք են տանում

Սիրո թափանցիկ, տխուր ձեռքերով,

Սև գիշերն իմ մեջ զնգզնգում է խոր

Անապատների կարմիր զանգերով:

Կարմիր զանգերին լեզվակները շեկ

Շեկ ավազների ձայնով ահարկու

Պատմում են իմ այս լուռությունը մերկ:

Սիրած տեսիլքի շուրթերով կարմիր

Իմ արյան ձայնն է անկանջիս հասնում.—

Ընկնող աստղերին ասում եմ աստղեր

Եվ ուրիշներին անհասկանալի

Երգերին դարձյալ երգեր եմ ասում:

Կորած ծովերիս ասում եմ ծովեր,

Իմ կորած ծովեր՝ ասում եմ կրկին,

Իմ խուլ ցավերին ասում եմ ցավեր,

Երկիր եմ ասում իմ կորած երկրին:

Կորած օրերիս ասում եմ՝ օրեր,
Որբեր, ասում եմ, ձեր ցավն ինձ կերավ,
Ախր, ի՞նչ անեմ ես ձեզ հետ, որբեր,
Անհրավ սիրո որբեր անհրավ:

Եվ համր այսպես, ու խուլ, ու կորած,
Կորած հույսերիս ասում եմ՝ հույսեր,
Անհունության մեջ կախված ձեռքի մեջ
Կծկվում է սիրտս,
Եվ կորած սիրուն ասում եմ՝ իմ սեր:

●

Քո տառապանքը դու տարար քեզ հետ,
Ինձ մենակ թողիր աշխարհիս վրա.—
Ու լուռ դարերի ունակոյիս սրտով
Ես այս աշխարհի ցավերն եմ սգում:
Աշխարհի ցավով տառապելու մեջ
Քո ցավը, հոգի՛,
Քո տառապանքը,
Քեզ ունենալու
Հարստությունն եմ կրծքիս տակ զգում:

ԽԱՌԸ ՏԵՍԻԼԲԵՐ



Մի սրտամաշ կանչով օրորվելով անվերջ,
 Հետևելով իրենց սարսափահար ներուն,
 Սև ցուլերի նման, մթին գիշերվա մեջ,
 Վագոճները փուլթով իրար պոզահարում
 Ու գնում են առաջ անիրական ծայնով,
 Ասես պիտի կորչեն անհայտ այս աշխարհում:

Վագոճներում նստած ուղևորներ անթիվ,
 Իրենց առօրեական հոգսերի մեջ թաղված,
 Կա՛մ ծամում են երգեր, կա՛մ խմում են գինի,
 Կա՛մ իրար են նայում հայացքներով շաղված,
 Կա՛մ քնում են և կա՛մ իրար ընդմիջելով
 Լի՛րբ, վավաշո՛ւտ, տխո՛ւր պատմություններ
 պատմում

Մի կերպ կյանք են դարձնում Նյանքը աղավաղված:

Թանձրանում են դանդաղ լույսերը թո՛ւյլ, դեղի՛ն,
 Հորանջում են ծխով մոխրամանները բաց,
 Դռներն իրար վրա աղմուկներ են դարսում,
 Ներս է մտնում ահա ուղեկցողը հարբած,
 Նրա համար ոչի՞նչ չկա այս աշխարհում,

Եվ աչքերը ասես նժույգներ են արնոտ՝
Մուրհոնքերի ծալվող աղեղներով թամբած:

Ու փնտրում են նրանք, այդ աչքերը վայրի
Անտոմա ուղևորներ, մարդիկ, որոնք հիմա
Դրամ պիտի դնեն դեղին ձեռքերի մեջ,
Եվ նա պիտի առնի,
Ծոմովելով ժպտա
Ու գոհանա, գնա՛:

Թանձրանում են դանդաղ լույսերը թո՛ւյլ, դեղի՛ն,
Հորանջում են ծխով մոխրամանները բաց,
Դոները խուլ դարձյալ աղմկում են մի քիչ,
Հեռանում է դանդաղ ուղեկցողը հարբած:

Ու էլ չկան արդեն անտոմա ուղևորներ.—
Հիմա բոլորն արդեն օրինավոր որբեր,
Հիմա բոլորն արդեն հավասար են իրար,
Եվ էլ չկան ինչ-որ հարազատներ, խորթեր.—
Հիմա բոլորն արդեն վայրի այս թափոփին
Ե՛վ ճորտեր են, և՛ տեր:

Անտո՛ւն ուղևորներ, անտո՛ւն ուղևորներ,
Ոչ ոք չի հարցնում ձեզ, թե դուք ո՞ւր եք գնում,
«Անտուն ուղևորներ, անտուն ուղևորներ»՝
Վագոնների չորուկ չխկրտոցն է կրկնում,—
Անհայրենիք, անտուն կրակների նման
Ինչո՞ւ այս աշխարհի անկյուններն եք ցրվում:

Ո՛ր եք գնում արդյոք, ոչ ոք չի հարցնում ձեզ,
Եվ դուք կուչ եք գալիս անհայտության վախից,
Ձյունների մեջ ընկած արյան կաթիլի պես,
Կարծրանում եք՝ որպես մի անհարկու թախիծ:

Եվ սրտամաշ կանչով օրորվելով անվերջ,
Հետևելով իրենց սարսափահար ներուն,
Սև ցուլերի նման, մթին գիշերվա մեջ,
Վագոնները փուլով իրար պոզահարում,
Ու գնում են առաջ անիրական ձայնով՝
Ապես պիտի կորչեն անհայտ այս աշխարհում:

Երկիրը շո՛գ, քրտնա՛ծ պտտվում էր անվերջ,
 Օդը զարհուրելի ժանգահոտ էր բուրում,
 Ու տնքում էր կյանքը՝ ցավագնորեն հոգնած,
 Երկաթի հոսք տանող անծայր փողոցներում:
 Ու տնքում էր կյանքը:
 Ու չեմ հիշում ոչինչ:
 Ու մշուշը դեղին՝
 Ուղեղիս մեջ քնած,
 Փոշու հատիկներով գուրգուրում էր բառեր՝
 Խեղդող կարոտների զառանցանքով զնած:
 Ճկկում էին բառեր:
 Ու չեմ հիշում ոչինչ:
 Ճկկում էին քնատ ճնճողիկների հանգույն,
 Պատեպապ էր խփվում
 Մի փուչ իմաստությում՝
 Օրերի մեջ տկար,
 Եվ կյանք կոչվող անմիտ մի եռուզեռ անգույն:

Ու փողոցներն ահա,
 Երկաթի հոսքն անփայլ,
 Ու ես մայրի վրա՝

Անմիտ, զառանցական,
Իբրև հավատարիմ իմ օրերի ոգուն՝
Կապում էի իրար
Իմ անցյալն ու ներկան:
Ու տոթը սև՝ դեղի՛ն, կարմիր կայծկլտոցով
Կտցահարում էր իմ երազները թաղված,
Ու մի մեղու,
Ահա,
Անձայն ու անբզզոց,
Աջ ու ձախ էր ճոճվում՝
Օդում կախված:
Մեղո՛ւն:
Օդում կախվա՛ծ:
Այնպես:
Առանց ձայնի:
Անհեթեթ էր կարծես,
Զարմանալի անմիտ,
Զարմանալի փափուկ:
Աստվա՛ծ իմ, ի՛նչ մեղու,
Որ թևերը զնգան
Ու նա ձայն չհանի:

Ու ես սիրո տամուկ բառեր էի փնտրում,
Որ ազատվեմ այդ շոգ մեղկությունից նսեմ,
Ես ինձ տանում էի խորքը անտառների,
Որ մի շշուկ,
Մի ձայն,
Կամ մի շրշյուն լսեմ:

Ուզում էի ամպեր,
Հեռաստաններ մաքուր,
Ու գետերի խշշոց,
Ու խոտերի սոսավ,
Եվ ինձ թվաց նույնիսկ ինչ-որ ակնթարթում,
Ինչ-որ մի բան սրտի՞ս, թե՞ ականջիս հասավ:

Սակայն երկիրը շո՛գ,
Պտտվում էր անվերջ,
Մեքենաներն էին-փողոցն ի վեր կանգնած.
Եվ, ո՛վ զարմանք,
Մեղուն բեռնաթափը ծակեց,
Ծակե՛ց,
Անցավ մեղուն,
Ու մի հազար դար էլ այն կողմ գնաց:

Երկիրը շո՛գ,
Քրտնա՛ծ,
Պտտվում էր անվերջ,
Օդը զարհուրելի ժանգահոտ էր բուրում,
Ու տնքում էր կյանքը՝ ցավագործն հոգնած,
Երկաթի հոսք տանող անծայր փողոցներում:

●

Սնձրևից ծեծված, հողմից հալածված,
Ծակ տրեխներով գնում էր Աստված,
Ինքը երկնքից իր արտասուքով
Իր կյանքը, ճամփան պատել էր սուգով:

Ինքը գնում էր թեթև ու ներհուն,
Որպես սկիզբն ու վախճանը կյանքի,
Ինքը տանում էր իր մերկ ձեռքերում
Բախտ արարելու
Իր կախարդական լեզվակը զանգի:

Եվ գնում էր նա
Լքված ու մեռակ աշխարհի կողմից,
Եվ ո՛չ ոք, ո՛չ ոք չէր կանչում նրան,
Որ ապաստան տա անձրևի՛ց, հողմի՛ց:

Եվ նույն ժամանակ աշխարհից այս չար,
Պարզված երկնքի անհունները մութ,
Բյուրավոր ձեռքեր իրենց Աստըծուց
Աղերսում էին գորովանք ու գութ:

Փղոսկրե անիվներով
Հեռանում է բախտն օրեցօր,
Մթնում է դեմքն արեգակի,
Խամրում է հավքը ոսկեցուլ:

Թիթեռների թևերի մեջ
Մի գունագեղ ձայն է հանգչում,
Որ այսօրվա մայրամուտին
Պիտի մեռնի մարմնիս խաչում:

Եվ գողգոթան ինձ ի՞նչ՝ թե ո՛վ
Կգարդարի ծաղիկներով,
Ինձ ինչ, թե ո՛վ,
Ինձ ինչ, թե ո՛վ
Կմնա մի՛շտ, մշտահուլո՛վ,
Կմնա, որ աշխարհն արար
Դարձընի խո՛ւլ, անգույն քարայր:

Ո՛ւր են վազում ծեր ու ջահել,
Մարդկանց այս ի՞նչ է պատահել,
Որ մեղքի բույն այս աշխարհում
Ոչ մեկը չի ապաշխարում:

●

Ինձ գարնան մի օր դրին անկողին,
Շուրջս շարեցին երազներս ողջ,
Շողշողուն մտքեր
Կրակների պես շարեցին հողին
Եվ համբուրեցին ձեռքերս դողդոջ:

Նրանք գնացին, կորա՛ն, չքացա՛ն,
Եվ հայտնվեցին, ինչպես հեքիաթում,
Ես ճերմա՛կ, ճերմա՛կ սավանների մեջ
Մոխրացել էի մի ակնթարթում:

Անվերջ կործանվող գահերի միջով
Իմ մոխիրներից
Մոտենում էր լուռ մի անհուն թափոր,
Նրանք բոլորը անաչք ու անձայն՝
Մաքուր արցունքով շաղախեցին ինձ
Եվ ինձ դարձրին արցունքի սափոր:

●

Ժայռերի կրծքից բլվոց էր գալիս,
Վրանների տակ հագում էր քամին,
Գլուխներն իրենց թաթերին դրած,
Գամփոները խուլ մոմոում էին:

Ճերմակ տանիքներ կային ձմեռվա,
Ու փոքրի՛կ, տաքո՛ւկ տնակներ կային,—
Մթնում մարմրող ծուլ խարույկներից
Գալլի աչքեր էր փախցընում քամին:

●

Ինձ մի՛ թաքցրեք հովհարների տակ,
Մի հայտնաբերեք ինձ կրկեսներում.
Գիներտների գաղջ մշուշի մեջ
Գգվանքի փայլ եմ ես ձեր աչքերում:

Մի ձեռք ինձ անհայտ, մուկ ոլորտներից
Անդուլ թմրության խարուկ է բերում.—
Նա ինձ թաքցրեց հովհարների տակ
Եվ հայտնաբերեց ինձ կրկեսներում:

●

Մաղվում է ցած
Անձրևը մե՛ղմ, մեղմ ու դանդաղ՝
Իմ հուշերի հովիտներում
Իմ զոհերի վրա անթաղ:

Իմ հուշերի հովիտներում
Նրանք մեկ-մեկ սյուներ ծխի,
Ոլորվում են անձրևի մեջ
Ու հեկեկում են դառնաղի:

Անձրևի հետ լռում են լուռ,
Ինչ-որ վերջին աղոթք անում,
Ոսկեթիկնոց ու ոսկեխույր
Աշնան հեռուն են սլանում:

Ուր որ փոքրիկ մի գյուղից դուրս
Առնում է խոր ճիւղն իր անփույթ
Հառաչների՛, արցունքների՛
Ու ցավերի մի հողակույտ:

Հավաքվում են նրանք այնտեղ,
Գալարվում լուռ հառաչանքով.—

Ոչ ոք նրանց չի կանչում տուն,
Նրանք ինձ են կանչում հերթով:

Այդ ծայերը լսում են ես
Հավերժության խուլ խորքերից,
Նրանք սուզվում են հողի մեջ
Եվ հողից դուրս թողնում են ինձ:

Մաղվում է ցած
Անձրևը մե՛ղմ, մեղմ ու դանդաղ՝
Մե՛ն-միայնակ
Մի կորածի վրա անթաղ:

Երեկ տխուր, այսօր ուրախ,
Ալիքի պես ծափ եմ տալիս,
Երեկ՝ դեպի անհայտություն,
Այսօր դեպի ասի եմ գալիս:

Լուռ ժպտում եմ փոքր ու մեծին
Կամ ծիծաղում խենթի նման,
Ինձ բաշխում եմ ավազներից
Անապատի գետի նման:

Ինձ բաշխում եմ անմնացորդ,
Իմ ժպիտներն ո՛ւր են տանում,—
Ծիծաղիս մեջ ամեն անցորդ
Հոգնած հոգիքն է լվանում:

Վաղը երբ որ մշուշ լինի,
Եվ արցունքներ ծնվեն ցավից,
Գուցե մեկը փոքրիկ մի կայծ
Ետ բերի ինձ իմ ծիծաղից:

●

Ու գարնան հետ տխրությունով թափանցիկ
Ու կարոտով անմեղսունակ որբերի
Գնում էինք դեպի սարերը հեռու,
Դեպի հեռու օթևաններն ամպերի:

Ու տրտմության բողբոջներով պայթուցիկ,
Ու մանկության տեսիլքներով անհամար
Ալպիական մանուշակներ՝ զանգակներ,
Ղողանջյունով իջնում էին սարն ի վար:

Ճչում էին վայրի բաղերը խելառ,
Ճչում էին գագաթնասույզ լճերում,
Եվ օրերի տագնապների ծայնը մառ
Արձագանքով խեղդվում էր այդ ճիչերում:

Ազատության դռները բաց և ազատ՝
Ազատության խաղաղությամբ օրորուն,
Ճոճվում էին աղբյուրների ղողանջով
Ազատության Նարգիզաբույր օրերում:

Մտերմության կարոտները թևավոր
Ճախրում էին կապտաշուկ եթերում.—
Պառկո՛ւմ էինք,
Քնո՛ւմ էինք,
Չկայի՛նք՝
Ճնճղուկների ծվլոցից
Հյուսած քողի ետևում:

Մեր խոհերին, մտքին տիրակալ է մի ձեռք,
Եվ մեկն իր անդունդն է քաշքշում մեզ համառ,—
Ժամանակի մասին հորինում ենք մի երգ՝
Մի տրտմություն, մի ցավ փարատելու համար:

Մենք լսում ենք նրա դոփյունն անբռնելի,
Եվ օրերի վազքը՝ սրարշավ ու հաղթող,
Եվ մանկորեն, անզոր դողդողում ենք էլի
Անփույթ ժամանակի ձեռքերի մեջ անդող:

Նրա անծայրածիր, անհուն փափկության մեջ
Տեղավորում ենք մեր վայրկյանները կոպիտ,
Նրանք հողմերի հետ թռչում կայծկլտալով
Եվ մարում են անդարձ տխրության մեջ կոկիկ:

Փափուկ երազներով, փափուկ երազներով,
Հարմարվելով արդեն կորուստների ցավին,
Կորցրածի ետքից երբեք չհասնելով,
Գորշությամբ են փոխում կարոտների ծավին:

Ի՛նչ երգերի կրակ,
Ի՛նչ բույրերի կարոտ,
Օ՛, ի՛նչ տենչանքների կայծկլտոցներ հանգան,
Եվ ի՛նչ Սիրո Որբեր պիտի ծնվեն էգուց,
Որ մեր կորուստներն ու կարոտները ցանկան:

Նրանք պիտի անցնեն,
Նրանք պիտի գնան,
Շփոթվածի քայլքով,
Մոլորվածի նման:

Եվ Հավատի փռշին,
Ճերմակ եղյամ որպես,
Պիտի պատի նրանց,
Հորիզոնը և քեզ:

Տառապանքում կա ծայն,
 Եվ ծայնի մեջ կա լույս,
 Եվ լույսի մեջ ոգի.—
 Եվ ոգու մեջ ահա դու կանգնած ես մենակ
 Որպես տրուբադուրը չթվարկված գործի:

Բարի՛, եղբայրորե՛ն ինձ ասում ես՝ ապրի՛ր,
 Թող բուքը քեզ երբեք չհալածի,
 Թող չծեծի քամին, մտրակ չիջնի վրադ,
 Ոչ ոք քեզ ճորտության
 Համար թող չվարձի,
 Ասում ես ինձ՝ ապրիր ուրախ ու երջանիկ,
 Առանց հարստության, առանց փառք ու գանձի,
 Ասում ես ինձ՝ ապրիր անխարդախ ու անցենգ,
 Ասում ես ինձ՝ ապրիր,
 Ապրիր՝ որպես բույրը ցորեն հացի,
 Եվ մեկ-մեկ էլ կրկնիր՝ «Եղբայր եմք մենք»:

Ոչի՛նչ, ասում ես դու: Մի՛ տառապիր, ոչի՛նչ,
 Լեռները չեն չոքում քամիների վախիզ.—
 Եվ օրորվում ես դու,
 Եվ շնկշնկում ես դու,

Որպես տափաստանի մի անկյունում բուսած
Հավերժական թախիծ:

Ոչի՛նչ, ասում ես դու, ոչի՛նչ, ոչի՛նչ, ոչի՛նչ,
Տես չի եղել ոչինչ, չի լինելու ոչինչ,
Մի պուտ եղբայրություն պահիր կրծքիդ խորքում,
Եվ չեն մթնի երբեք աչքերդ ջինջ:

Ես հավատում եմ քեզ, երբ նայում եմ ցավիդ
Եվ հավատում եմ քեզ, երբ նայում եմ ահիդ,
Եվ քո խաչը ահա ես տանում եմ հլու.—
Եվ չգիտեմ՝ վաղվա խաչերի մեջ
Մեր խաչն ո՞վ է արդյոք շալակելու:

Ոչի՛նչ, ասում ես դու, մի՛ տառապիր, ոչի՛նչ,
Լեռները չեն չոքում քամիների վախից.—

Եվ օրորվում ես դու,
Եվ շնկշնկում ես դու,
Որպես տափաստանի մի անկյունում բուսած
Հավերժական թախիծ:

●

Ես հիշում եմ ծովը,
Խաղաղությունը մեծ,
Ադամանդներ կեղծող իր խաղերը լույսի,
Նրա ոգին, որ մերկ ալիքների վրա
Կարող է շողշողալ, ինչպես սիրտը ուզի:

Եվ այդպես է ծովը՝
Երջանկորեն հանգիստ,
Տարտամ, անիրական ու տրտմորեն բարի,
Նա իր խորքում մի մեծ հանգիստ է պահպանում,
Որ իր Ոսկե ձկան կյանքը չխանգարի:

Ոսկե ձուկը ծովի
Բախտն է հավերժական,—
Եվ երբ հանկարծ ծովի խուլ խորքերն են
խառնում,
Եվ երբ գողանում են նրա բախտը ոսկե.
Ծովը անհունորեն ընդվզում է մեկից՝
Ալիքները սրված դաշույններ են դառնում:

Ընդվզում է այդպես

Եվ պատրաստ է քայլել

Տիեզերքով՝ որպես հսկա զորաբանակ.—

Տերե՛ր, մի գողացեք բախտը ժողովրդի,

Տերե՛ր, դուք ձկնիկին ցույց մի տվեք դանակ:

Հավատացեք, եթե

Ծովն է ալեկոծվում,

Ապա ինչ-որ մի տեղ թաքուն ու տմարդի

(Օ՛, գուցե թե նաև առանց հասկանալու),

Գողացել են ոսկե բախտը ժողովրդի:

Ժառը ծառ էր ծնվել,
Ապրում էր ծառ,
Լիքն էր ամառներո՛վ, աշուններո՛վ, սիրո՛վ.—
Դատարկ անկյունները լցված էին
Կապույտ ստվերներով ու երկնքով անծայր:

Բողբոջել էր ծառը,
Ուտել, բողբոջել էր,
Որ՝ ուր որ է, ահա, պիտի ճաք տա,
Պայթի
Ու դառնա երգ,
Քամին եկավ հանկարծ,
Քշեց երկինքները ծառի անկյուններից,
Հետո բողբոջները շոյեց մեկ-մեկ,
Հետո փսփսուքով համոզում էր ծառին,
Թե՛ դու ծառ ես ծնվել,
Խույ ու համըր մի ծառ,
Թե՛ իզուր է,
Լավ չէ,
Մի դառնա երգ:

Եվ ուռուցիկ, կապույտ ջրերն իրենց վրա
Բարձրացնում են ճերմակ
Առագաստներ անթիվ,
Ուրոնք քամով լցված,
Ուռչում են անընդհատ
Ու լուռ քարանում են
Չսուրալու խանդից:
Եվ ուռուցիկ, թավշե շրթունքների վրա
Բառն ուռչում է՝ որպես
Բողբոջն ամենամեծ,
Եվ չի հիշում ոչ ոք
Ոչ մեկը չի հիշում,
Թե ո՞վ իրենց այդպես
Համրությանը գամեց:

Եվ լարումի ցավից
Կտրատվելով անլուր,
Հանկարծ տիեզերքում բանաստեղծն է ճշում,
Եվ սուրում են ծովում
Առագաստներ անթիվ,
Եվ պոկվում են շուրթից
Հնչյունները կաշուն,
Եվ լսվում է՝ ինչպես
Հողի ամեն հյուլե
Արձագանք է հնչում:

Նա ճշում է այդպես
Եվ ինքն արդեն չկա,

Նա ցրվում է կյանքի
Աչքերի մեջ ագահ,
Եվ նա չի՝ էլ լինի,
Չի՝ հայտնվի, մինչև
Այդ մե՛ծ, սարսափելի՝
Լռությունը չգա: .

Ա մպերն իջել ահա ճերմակ կտուցներով՝
Նոր արթնացող հողի բույրերն են հոտոտում,
Փափուկ ծիծաղի պես ալի՛ք-ալի՛ք-ալի՛ք,
Օրորվում են դանդաղ Թարթառ գետի հովտում:

Ու դաշտն անիրական երազներ է ծնում,
Թե ուր որ է, ահա, քեզ կգրկի ծածուկ,
Կփաթաթի մաքուր մշուշների քողով,
Բաց կարծակի բոլոր կարոտներդ անձուկ:

Նա կբացի ահա քո մարմինը փակված,
Եվ դուրս կգան բոլոր տագնապների թաքուն,
Եվ մենավոր մի ծառ, թեկուզ և գլխատված,
Կտեսնես թե ինչպես, միայն հենց քեզ համար,
Իր նոր, անկոտրելի ճյուղն է ճառագայթում:

Եվ խաբկանքը ահա հալհլում է կամաց,
Մշուշն ինքը իրեն դաշտի ծայրն է հրում,
Թրթռում է դաշտը մերկ աղջկա նման
Եվ լուռ գալարվում է կանաչ սարսուռներում:

Եվ թվում է, ահա, արդեն քանի տարի
Դու ընկած ես այդտեղ, հենց այդ դաշտի եզրին,
Որպես անպետք արոր, կամ որպես հին գութան,
Եվ քո աչքի առջև
Արեգակը դանդաղ բացումն է կատարում
Իշխանական դիրքով մենավոր մերկ ծառի
Եվ նրա մե՛ծ, անհո՛ւն, անծա՛յր ողբերգության:

Դակատագրի դառնության միջով
 Ես մարդուս անհուն ցավին եմ նայում,
 Մայրամուտի պես հրահալ եմ ես
 Եվ մայրամուտի նման անկայուն:
 Նայում եմ.— սիրտս կծկվում է ահից,
 Ապա ցրվում է արահետներում,
 Եվ նա, որ ձեռքս բռնել էր ամուր,
 Ինձ իր տրտմության ծաղիկն է բերում:
 Ասում է՝ նայիր շեկ բլուրներին,
 Կիսված են նրանք, սիրտն է քրքրված,
 Կիսել են, այո՛, սակայն չգիտեմ,
 Չգիտեմ ինչու, հավատում եմ, որ
 Ամեն կեսի մեջ մի սիրտ է դրված:
 Չգիտեմ ինչու՝ հավատում եմ, որ
 Երբ որ գետերի ջրերն են կիսում,
 Գետը իր սիրտը չի կորցնում բնավ
 Ամեն մի կեսով մի սիրտ է հոսում:
 Եվ եթե հողը դարեր ու դարեր
 Եվ վայրագորեն մաս-մաս են անում,
 Ինձ թվում է, թե ամեն մասի մեջ՝

Մնում է այնքան զորավոր մի սիրտ,
Որ նեղվում է իր փոքրիկ սահմանում:

Ճակատագրի դառնության միջով
Նայում եմ մարդու ցավերին անլուր.
Խեղճ մարդու կրծքում մի սիրտ է դրված
Եվ հազար կողմից բզկտվում է լուռ:
Եվ հազար ձևով մասնատվում անվերջ
Ցավը ցավով է նորոգվում դարձյալ,
Եվ մի հարվածով, մի բիրտ հարվածով
Անհետանում են ներկա ու անցյալ:
Անհետանում ու կրկին հողի մեջ
Գտնում են իրար թրթիռով, դողով.—

Մարդկանցով որքան որ հողն է ծածկված,
Այդքան էլ մարդիկ ծածկված են հողով:

Աշխարհը լիքն է կործանումներով,
Աշխարհը լիքն է տագնապով վայրի,
Մարդասիրության խենթ սամումներով
Մարդիկ քանդում են տունը աշխարհի:

Բառը տանջանքից խուլ թպրտալով
Արյունոտվում է շուրթերին իմ տաք,
Երբ որ տեսնում եմ՝ մագիլ է պահված
Իրար գուրգուրող աղավնիների
Փետուրների տակ:

Հիրավի, ե՞րբ է սկսվել անվերջ
Այս խառնությունը.
Մառդը իր ցավը ե՞րբ է ճանաչել.—
Տանջանքը գուցե ծնվեց այն պահի՞ն,
Երբ համր շունը սովորեց հաչել:

Առաջին վիշտը աշխարհի վրա
Չէր կարող մենակ, ուզում էր ընկեր,
Նրա մեջ վշտի տենչանքն էր եռում,—
Վշտերի հոտը քշում ենք հիմի

Դեպի անանուհ, անսահման հեռուն:
Եվ այդ վշտերի անսահման հոտին
Տե՛ր իմ, ի՛նչ տանջանք, Կայենն է հովիվ.—
Եվ կա մի վիշտ էլ, որ այդ Կայենին
Գիտենք Աբելի մահվան շնորհիվ:

Շոշափեմ ձեռքով և տեսնեմ աչոք,
Որ իմ մեջ չկա արնադավ Կայեն,
Մոլեռանդորեն իջած ծնկաչոք
Պագանեմ երկիր, առ աստված հայեմ:

Ապակու մեջ ահա ծառերն են օրորվում,
Ապակու մեջ երկինքն իր փեշերն է կախել,
Ապակու մեջ ես իմ պատկերին եմ նայում
Եվ չգիտեմ ինչու, ինձ թվում է՝ իմ մեջ
Աճեցրել են ինչ-որ անիրական վախեր:

Այն, ինչ բնությունը տվեց ինձ իր ոգուց,
Ապակու մեջ ահա իր փեշերն է կախել,
Այն, ինչ բնությունից գողացել են մարդիկ,
Նվաճել են իբրև՝ ազատությամբ մղված՝
Տարել են իմ միջից, իմ հոգուց են քաղել:

Եվ քանի որ լիքն է տիեզերքը համայն,
Բնության մեջ չկա տարածություն ազատ,
Ինչ որ գողացել են մարդիկ բնությունից՝
Տեղը կամ վախով են լցրել ու ձանձրությով,
Կամ ամեն մի թանկ բան մնացել է կիսատ:

Փողոցներում ահա, ուր օդ չկա վաղուց,
Վախով շրջապատված ծառերն են օրորվում,
Ճնճղուկները փոքրիկ սարսափներ են կարծե՛ս,
Կիսատ կարոտների մորճիկներին նստած,
Անվերջ կորուստների տագնապն են հոլովում:

Ճեղքելով ինձ մուտի նման,
Առավոտվա շողերը սուր
Երգում էին ցավն անսահման
Եվ օրերի տագնապը զուր:

Եվ գնում էր ճամփան անվերջ
Արհավիրքի դողով պատված,
Երգում էին մշուշի մեջ
Թթենիները գլխատված:

Այդ զորընդեղ հսկաներից
Մի սև սարսափ էր մնացել,
Որտեղ ուրուրն անգամ ահից
Նետվել էր ցած ու քարացել:

Այդ կոտորածն անծայրածիր
Արդյոք որտե՞ղ պիտի թաղվեր,
Ո՛ր էին տաք թներն արդյոք,
Որոնց վրա մեկիկ-մեկիկ
Կարմիր թուրջ պիտի կախվեր:

Կարմիր արյունն այդ հուրհրան
Տեղ չկար, որ դուրս գար, հորդեր,
Նեղվում էին արյան ցավից
Թթենիներ կանգնած ու կախ,
Եվ այդ ծառերը գլխատված
Դարձել էին արյան դագաղ:

Եվ չկար վերջ, չկար սահման.—
Այդ կոտորածն անծայրածիր
Արդյոք որտե՞ղ էր ընդհատվել.—
Ասես մի մեծ, ծաղկած բանակ
Դուրս էր եկել հողմերի դեմ
Ու գլխատվել:

Կանցնի էլի միլիոն տարի,
Արցախ երկրով հոսող Տրտուն
Կլարի լարն իր կիթառի,
Որ այս ցավը պատմի տրտում:

Եվ կլսենք այդ ցավը մենք,
Այնպես, կարծես օր չի անցել,
Կհասկանանք նրան այնպես՝
Ասես վաղուց ենք հասկացել:

Երբ որ մարդկությունը խաղաղ կեսգիշերին
 Մայր էր մտել քնի գորգերի մեջ նախշուն,
 Կատաղորեն, երկա՛ր ու ձանձրալի հաչեց մի շուն,,
 Մի շուն, որ հաչոցում իր երկար ու չնչին
 Բոլորովին չուներ երկրաշարժի տագնապ,
 Ողբերգությո՛ւն, մի ցա՛վ, կամ կործանու՛մ վերջին...

Նա ուղղակի այդպես հաչում էր մերթ հոգնած,
 Ու մեկ-մեկ էլ թեթև, կամ պաթետիկ շեշտով...
 Հետո կամաց-կամաց ուրիշ թաղի շներ
 Միացան այդ որբին
 Նախ՝ առանձին, հետո՝ դասակով ու վաշտով:

Մոլեգնորեն այդպես նա հաչում էր երկար,
 Որ իր ոգին զարթնող ամբոխի մեջ սուզեր—
 Եվ նա գոհ էր, դա էր ցանկացածը կարծես,
 Ուրիշ որևէ բան դժվար թե նա ուզեր.—
 Կամ պիտի հավատանք պատմությանն այս մաքուր
 Եվ կամ թե մտածենք,
 Որ շունն ուներ թախի՛ծ, կարոտներ ու հույսեր,

Ուներ ողբերգություն և երազներ վսեմ,
Արթնացնում էր, որ նոր մի խորհուրդ տա

կյանքին.—

Կյանք, որ նվնվում էր և՛ ձանձրալի, և՛ խեղճ.—
Մի՞թե ողջ մարդկության բառերն այս թանկագին
Այդքան հեշտ ու հանգիստ, այդքան անփութորեն
Կարող են ամփոփվել մի անծագո՛ւմ, մի ո՛րք
Խեղճ ու կրակ շան մեջ:

Մինչ ես կեսգիշերին մտքերս էի թերթում,
Նրա ձայնը չքվեց փողոցից ու բակից,
Ուրիշ ցեղակիցներ նրան գուցե կերա՛ն,
Եվ այս երգը ծնվեց և՛ մարդկության համար,
Ե՛վ այդ որբի համար, և՛ մեր բախտի համար,
Ե՛վ ինձ համար թաքուն ափսոսանքից:

Գ իշերվա մեջ կժերն իրար
Շշնջում են կավե խոսքեր,
Եվ կենդանի շշուկներից
Կավե շուրթերն են դալկանում,
Հողի խորունկ շերտերի մեջ
Ջնգզնգում են ջրի հոսքեր,
Եվ կարոտը կծկըվելով,
Հեռու սարերն է բարձրանում:

Կե՛ր կաց, վե՛ր կաց, քնած մանուկ,
Կախարդանքից խոր գիշերի.
Տե՛ս, կավի ձայնն է թանձրանում,
Օղակների մեջ կժերի:

Երգը հանգչում է քիչ առ քիչ
Աստղերի խուլ կայծկլտոցով,
Էլ ոչ մեկը չի տալու քեզ
Կարոտների բույրը խոցող:

Ոչ մեկը քեզ չի տալու բախտ,
Ո՛չ սեր, ո՛չ խիճդ ու ո՛չ թախիծ,

Մի բուռ հավատ, մի քիչ աստված,
Ոչի՛նչ, ոչի՛նչ, բացի վախից:

Վե՛ր կաց, վե՛ր կաց, քնած մանուկ,
Կախարդանքից խոր գիշերի,
Տե՛ս, կավի ձայնն է քարանում
Օղակների մեջ կժերի:

Դու կաց, արեգակ, դու կաց,
Ես գնամ ծովե-ծով ընկնեմ,
Ծովե-ծով լուսնյակը ման գամ,
Եվ նրա բոլորակ ականջից
Քո ոսկյա բառերը կրկնեմ:

Դու կաց, արեգա՛կ, դու կաց,
Արեգակ մանուկս է քնած,
Ծովե-ծով լուսնյակը բերեմ,
Մանկանս ճոճք անեմ կապույտ,
Որ այդ քո ծիծաղկուն մատներով
Ձեռ տաս ու չարթնանա հանկարծ:

Ցուրտ էր կյանքը, ցուրտ էր ու պաղ,
Չկար ոչինչ երգի համար,
Կար լոկ ցավի, կարոտների,
Տանջանքների մի տոթ ամառ:

Ցուրտ էր կյանքը, ցուրտ էր ու պաղ,
Ամառվա մեջ՝ ձմռան մի օր,
Որ զնգզնգում էր թախծալի
Աշունների ստվերներով:

Ցուրտ էր կյանքը, ցուրտ էր ու պաղ.—
Կար լոկ մի դեմք մարդահալած
Երազների վրա անթաղ,
Կարոտների վրա մեռած:

●

Գեղեցկության ոգին
Իմ հոգու մեջ ապրող հրեշտակների
Ջուլգ թևերից բռնած
Քաշում է ինձ...
Քաշում է ինձ անտակ սառցադաշտի
Տխուր սառցալույսով,
Որ տեղ-տեղ ընդհատվում է
Մի փոքրիկ կանաչով,
Մի փոքրիկ լուությամբ
Եվ անսահման, անծայր,
Անեզրական Հույսով:

Գիշերվա ծայնը մոմի պես դանդաղ
Հալչում է երկրիդ քարանձավներում,
Եվ ձեռքդ հուլիսի հրահալ մի գունդ,
Խմորում է դեռ երկրիդ ցավերում:

Ջարմանք էր աշխարհն հեքիաթների մեջ
Չույլ առավոտից մինչև մայրամուտ,
Եվ հավատալու ճիգ էր աննախանձ,
Եվ տառապանք էր՝ իմաստուն ու մուր:
Վարձք էր սիրելու, խինդի ու լացի,
Ինքնաբզկտում տխուր հանճարի.—
«Սևը ներսն անենք, ճերմակը դուրսը»,
Որ չաստվածանա պատկերը չարի:

Կտա՞ քեզ արդյոք պնդություն ոգու
Ծույլ ուրախության փոքրիկ մի տագնապ,
Երբ դու տեսել ես փլուզվող երգեր,
Եվ ապրել ես դու տագնապների տապ:

Ի՞նչ է մնում մեզ, եթե ոչ զգալ,
Որ այս աշխարհում պատահեց մեզ հետ

Եվ ամենամեծ խինդը-աշխարհի,
Եվ դառնությունը մեծագույն ու մեծ,
Եվ ամենամեծ աղետն աշխարհի.—
Եվ աղետ տեսած իմաստունի պես,
Ապրել այս կյանքը խոնարհ ու բարի:

Ապրելու տենչը ծորում է դանդաղ
Բնության ամեն շնչող հյուլեհից,
Եվ քո ձեռքն, ահա, արևից առաջ
Արևի նման արթնացնում է ինձ:

Քեզ երկրագունդը փռել է իր մեջ,
Եվ մանկան նման մի մեծ Անհունի,
Բույր ու ծաղկունք է քաղում քո միջից
Եվ գույն-գույն երգեր, որ ինքը չունի:

Ջրերը քո մեջ խշշում են կամաց,
Երկինքն ալիք է տալիս կապույտով,
Իմաստությունդ մանկանում է խիստ,
Եվ կախարդվում է փոքրիկ արտույտով:

Լուռ թիթեռները ճչում են քո մեջ,
Չեն պահում իրենց խինդն ու լացերը.—
Ի՞նչ անենք արդյոք,
Գուցե հավատա՞նք,
Որ այս աշխարհում ինչ-որ տեղ դարձյալ
Բանաստեղծներն են դեռ Աստվածները:

Ապառաժների լուռն փրա
Քարայծն սպիտակ առագաստի պես
Լողում է ձորի կապույտ երկնքում:

Իր փոքրիկ, տխուր գլուխը թեքում,
Տխուր աչքերը թափանցիկ, տխուր զանգակների
պես

Կախում անդունդին,
Լուսնյակ պողերով պողահարում է դեմքը լուսնյակի,
Եվ մի անմոռաց, հավիտենական
խոր ավստսանքի

Փշրանքներ խամրած
Ընկնում են հատ-հատ
Ձորում թավալվող սարսափի վրա:

Կարոտի լեզուն ճերմակ հպումով
Նրա շուրթերից սրբում է ճաքած տապը կարոտի,
Եվ զանգակները թրթռում են վայրի
Արտացոլանքով տխրաբախ սրտի:

Քարերի կրծքին կակաչներ կարմիր
Անտիկ ծաղկումով այրվում են կրկին,
Եվ նոանց բոցը օրորվում քամուց
Ու խշխշում է ժայռերի ձեռքին:

Եվ մարդու ձայնը մեծանում հանկարծ
Վայրկյան առ վայրկյան ելնում է հզոր
Բնության անդունդ--օրորոցներում.—
Այդ անպարագիծ օրորումի մեջ
Մարդը՝ ինքն այնպես հեշտ է մեծանում:

Ես հողմահալած առագաստի պես
Կանգնել եմ ծերպի սարսափին շողուն,
Իմ ոտքերի տակ թափուր Անապատ,
Թափուր հուշերի վտառն է լողում:

Ես ու քարայծը սարսափի վրա
Կանգնել ու իրար նայում ենք անվերջ.—
Իմ լուռ կարոտի ձայնն է դողանջում
Քարայծի տխուր զանգակների մեջ:

Ես քեզ շնջում եմ բառեր հասկանալի,
 Ես քեզ ցույց եմ տալիս ամեն օրվա խոսքեր,
 Եվ դու՝ կանա՛չ, թավշե՛, օրորվում ես, իմ մեջ
 Ծանրացնելով անհուն երջանկության հասկեր:

Քո ծառերը բոլոր ճառագում են լույսով
 Երբ դու նրանց վրա
 Ուրախության տաքուկ բողբոջներ ես շարում.—
 Եվ ծառերդ մեկ-մեկ սարսռում են ահից,
 Երբ որ իրենց մասին գրված երգը հանկարծ
 Քոնը չես համարում:

Ինչո՞ւ, արդյոք ինչո՞ւ անել ցրիվ-ցրիվ,
 Այդպես կարող եմ, չէ՞, քամիները քշել:—
 Հետո հավաքում ես այդ երգերը մեկ-մեկ,
 Հետո թույլ ես տալիս կարոտել ու հիշել:

Եվ մենք մեր բախտի մեջ տեղավորված անփուլթ,
 Ինչպես մարգարիտն է իր խեցու մեջ փակված,
 Կախարդական ճավով ճամփորդում ենք քեզ հետ՝
 Մեծ ջրերի կապույտ անեզրությանն հակված:

Եվ երբ Երեկոյան ճառագայթի վերջին
Անջատվում է իր մեծ ճամփորդության հունից,
Քո խորքի մեջ թաղված ես մրմնջում եմ դեռ՝
Հայրենիքը ցեղը փրկեց կործանումից:

Ի նձ ասում են հաճախ, թե ծուռ են իմ երգերը,
Միևնույն լուռությունը, նույն թախիծը հաճախ
Կոտրատվում են ջարդված իմ տողերի
Թանձր գունախաղում:

Ծո՛ւռ են իմ երգերը,—

Ծո՛ւռ են, որովհետև նրանք անում են քարերի մեջ
Եվ քարերի բույրն են
Տխուր մեր աչքերի անապատին մաղում:

Ոմանք բուֆ քարերով ծռել են իմ երգերը,
Ոմանք բուֆ հայացքով
Իմ գույները դարձրել են փոշի,
Ոմանք երգս են թաղում,
Ոմանք՝ անյունները ջարդված իմ տողերի,
Ոմանք թաղածներն են կրկին թաղում:

Իսկ ես.— Սասնա Ծուռ եմ.—

Իմ զորավոր ձայնից դատարկվել է ժայռը,
Ես մտել եմ այնտեղ
Եվ պատմության քարե երկանքների վրա
Համբերության ոսկե հատիկներն եմ աղում:

Նա խո՛ւլ, համ՛ր, անձա՛յն,
 Արարչության մեջ էր ապրում երկար.—
 Ինչ-որ անհայտության, տարտամության խորքում
 Լիքն էր միրաժներով,
 Կարծես չկար
 Եվ կար:
 Եվ չգիտեր՝ ինչպե՛ս հավատա ինքն իրեն,
 Չայնին,
 Լոռւթյանը,
 Խոսքին,
 Տագնապներին,
 / Հետո մի «Այբ» հանկարծ ճառագելով եկավ՝
 Ադամանդե մի մեծ շղթա ձեռին:
 Շղթան տեղ-տեղ հալվում, դառնում էր լույս,
 Հետո ինչ-որ կիսատ և անորոշ բառեր.—
 Նա տագնապում էր խիստ, հուճցում էր այդ լույսը,
 Չն էր տալիս, ոգի, դարձնում էր գրեր:
 Հետո փաթաթում էր սիրով, խանդով, թախծով,
 Այն բոլորով, ինչ որ Տերը իրեն տվեց,
 Հետո հավատում էր ձայնին, խոսքին, ցավին,
 Իր մեծ Լոռւթյանն ու Տագնապներին իր մեծ:

Խուլ դարերի միջով,
Ինքն իր ցավ ու վեճով,
Տառապելով գալիս, փոռւմ է լույս՝
Այն ոգեղեն շղթան,
Ոսկեղենիկ շղթան,
Որից քաշքշում են ամեն ծուռ ու վայրի,
Որից քաշքշում են
Ամեն թուլք ու շելթան,
Որից ոչ մի օղակ չի նետվում դուրս:

●

Ձրասուլզ երկինք ու սուզված հուշեր.—
Այս գիշեր որտե՞ղ թաղենք մեր հոգսը,
Այս գիշեր թաղված հոգսերի կողքին
Մեր հոգսը որտե՞ղ թաղենք այս գիշեր:

Լճի երկինքը մաքուր աստղերի,
Անպաճույճ լուսնի մեհյան է կապույտ,
Լճի երկնքի անտառների մեջ
Մեր հոգնած, հոգնած երկինքը կախենք՝
Տրտմությամբ, սիրով,
Առավոտ կելնի արեգակն արդար
Եվ կպարուրի մեզ մեր հոգսերով:

ՈՒ՛ր է այն թշվառ
Թռչունների չուն,
Որով իմ բախտն էր
Գուշակում գնչուն:
«— Նրանք գնացին՝
Սուր կտուցներով
Կտցահարելու
Ծառից կախվածին»:

Օրերն ընկնում են ձյունների պես՝
Ճերմակ ու կապույտ մշուշ հագած,
Ընկնում են անդարձ, անդառնալի,
Ու մեղմիկ սարսուռ—ծլնգոցով
Փչում է օրերի սառը քամին՝
Սառցակալում են օրերն ընկած:

Թեթև թեքվում է մեջքը թեթև,
Ու սայթաքուն է քայլքը դառնում,
Անխուսափելի անկումի հետ,
Ինչպես մանուկների աղաղակներ՝
Քամին հուշերի ձայնն է խառնում:

Ճամփան դառնում է անմեկնելի,
Անհորիզոն ու անծայր, անվերջ.—
Ծակվում է մի տեղ սառցե երկիրն
Ու մարդն ընկնում է հավերժի մեջ:

Մարդկային երթը օրորվում է ծուլ
երկա՛ր, անսահմա՛ն դարերի միջում.—
Ես աշխարհ եկա մեռակ ու տխուր
Ու լուռ նաճագեցի շարասյան վերջում:

Անվերջ տառապած, ճմրթված ու հին,
Անթիվ ձեռքերում քրքրված արդեն՝
Ինձ փոխանցեցին ծիծաղի մի լաթ,
Որ տխրությունից իմ հոգին սրբեմ:

●

Կապույտ ծառերը մատներով կապույտ
Կարոտ են կաթում պաղ շրթունքներից...
Մենք այդ կարոտը կխմենք երկար,
Երկար կթախծենք,
Կլոենք երկար,
Մինչև տերը մեզ կխփի քարին,
Կջարդի մեր այս պատյանը սիրուն,
Մեզ կդարձնի թեթև ու ներհուն
Ոգի՝ անկարուստ տիեզերքի մեջ.—
Մեզ կպարուրի
Հավիտենության փայլը հուրհրան,
Եվ մենք լուսնի հետ կփայլենք մեկ-մեկ
Խաղաղ լճերի մերկության վրա:

●

Անհայտ, անանուն հոգսերի միջին
Անծանոթ ձայներ օրորում են մեզ.
Մեր բախտի անհայտ ճամփեքի վրա
Գնում ենք, գալիս ճոճանակի պես:

Մեր արարիչը մեր բախտի մասին
Բան չի ասում մեզ:

Այդ մասին նա լոկ ձյուներից պատմեց,
Շփոթված իջան ձյուներն երկնքից
Եվ սփթնելով՝ համրացան, սառան,
Այդ մասին նա լոկ անձրևին պատմեց,
Եվ կաթիլները կարկուտներ դառան,
Այդ մասին նա լոկ հովերին պատմեց,
Հովերը փրցված հառաչներ տարան,
Եվ անտառները խշշացին վայրի,
Ու հեռո՛ւ-հեռո՛ւ, հեռո՛ւ անդունդից
Մի մայուն լսվեց որբացած գառան:

●

Քամին ծառերի չորցած կողերից
Բվվոց է հանում,
Բուքն անտառների մոունչն է փռում
Մայրերի վրա,
Եվ անապատան մի տխրություն կա,
Որ կծկվում է օձիքների մեջ.—

Հավիտենության կանչը լսելիս
Քանդվում է հոգին,
Եվ թվում է ինձ,
Թե մեր մարմինը ոչ թե հողից է,
Այլ՝ արցունքներից:

●

Անսահման անուշ քնքշություններով
երկնքի՝ ճերմակ հողերը թափվում
եվ հողագնդի խոր փոսերի մեջ
Թաղում են փոքրիկ տնակները մեր:
Թաղում են ճերմակ պատարագների
Եկեղեցական մի փոքրիկ ծեսով,

Իսկ մենք ժպտում ենք,
Միշտ էլ ժպտում ենք
Ձյան տաքությունով ապրելու հույսով:

2 յուններն սպիտակ շրթունքների պես
 Ռջան ինձ վրա,
 Ծածկեցին մարմնիս վերքերը բոլոր,
 Եվ ինձ պատմեցին աստղերի մասին
 Եվ կրկնում էին, թե աստղեր չկան,
 Իսկ ես մոլորված հիանում էի
 Մութի մեջ հանգչող
 Նրանց սպիտակ թրթռումներով:
 Նրանք ինձ ասին, թե աստղեր չկան
 Եվ լալիս էին տաք համբույրներում
 Եվ կրկնում էին, թե աստղեր չկան,
 Նրանց մորմոքը չէի հասկանում:

Եվ նրանք ասին, թե մահ էլ չկա,
 Մեռնում ես, կրկին հարություն առնում,
 Ես հավատացի, և մի պահ միայն
 Անգոյությանը տվեցի կյանքս
 Եվ այլևս ետ չվերստացա:

ԴԱՏԱԴՈՒԹՅԱՆ ՏԵՍԻԼԲԵՐ

1

Մեծ կամուրջների ուսերին դրված
Փողոցների սև ու սառած դիեր:
Սյունաշարքերի տխուր պատարագ:
Եվ դիակների երկու կողմերում
Վառվող մոմերի շշուկն եմ լսում,
Ես՝ մեռավորիկ, կեսգիշերային մի
հուղարկավոր,
Ես քարշ եմ տալիս փողոցների դին
Թռչող շենքերի լաբիրինթոսում:

Ժայռերից անդունդներ են կախվել,
Որոնց օրոցքի մեջ
Խավարի կողերն արյունելով
Օրորվում է գետը՝ /
Պղնձացած մի երգ դանդաղ խտացնելով
Ժայռի երակներում:
Մի բուրժայռաբեկոր
Կտրտում է մաս-մաս մանկան մի ճիչ՝
Թարթիչների խոնարհումը անդունդների վրա
Համարելով վերջին,
Անդավաճան, անկիրք հանգստություն:—

Այդ մորթոտվող արյան կաթիլն է, որ
Թպրտում է թռչնի մարմնի պես:

Այդ խավարն է, որ լուրթ կեսգիշերին
Ինքնասպան է լինում անդունդի մեջ:

Այդ իմ կնճիռներն են իմ ճակատի վրա,
Ձեր հոգսերից ուռած,
Որ լաթի պես ժանգոտ հոգիներն են սրբում:

Ծուխը մոլորվել է սարդոստայնում, սարդի
ոտքերի մեջ—

Բացե՛ք պատուհանը,

Քամին

Նրա ձեռքից բռնած կտանի դուրս:

Մեկը կանչում է ինձ,
Երկուսը կանչում են ինձ,
Կանչում են բոլոր ապրողներն ու մեռածները բոլոր,
Կանչում են բոլոր օտարները՝ հարազատի ձայնով,
Եվ հարազատներս կանչում են ինձ՝
Երակներիս արյան անհուն ձայնով:

Ապրողների ձայնը քաղում ինձ հետ,
Ինձ հետ ծիծաղում է
Տարօրինակ մարդկանց թախծի վրա,
Մեռածների ձայնը գալիս հեռվից,
Կամարների նման կախվում է լուռ
Ապրողների ձայնի,
Նաև ինձ հետ ապրող
Տարօրինակ մարդկանց թախծի վրա:

Ապրողների ձայնը խլացնում է ահա
Չարքաշ իմ ուղեղը և իմ հոգին բարի,—
Ես գնում եմ առաջ.—
Կամարների տակից,
Ապագայիս միջով
Ես գնում եմ դեպի ձայնը մեռածների:

Ի մ սրտում ասեղներ կան ցցված,
Տառապանքի սուտակե ասեղներ,
Եվ ասեղներ կապույտ,
Որ տեր-աստծո նման կարոտն է արձակում
Հայոց աստվածների բարձունքներից:

Իմ սրտում ասեղներ կան,
Որոնք օր ու գիշեր
Գործելով հորինում են
Տառապանքի դեղին, դեղնամշուշ մի երգ:

Եվ դու զարմանում ես՝
Թե ինչպե՞ս է փոխված
Ասեղնագործ անծայր մի մեղեդի
Քո տաք ճանապարհի դեղին փոշու վրա:

Քո թափանցիկ ոտքերը
Տրորում են փափուկ այդ մեղեդին—
Եվ ասեղներ փայլուն,
Ծակծկելով սիրտս,
Իմ սրտի թելերից հյուսում են
Ասեղնագործ մի երգ:

Ժամանակի բոլոր ասեղները
Մեխված են իմ սրտում:

Դու գալիս ես, որ մեկ-մեկ
Հանես այդ ասեղները,
Կամ մի վերջին ասեղ մխրճես իմ սիրտը:

Իմ սրտում ասեղները արևի ճառագայթներ են,
Քրքրված արշալույս եմ պահում ես իմ կրծքում:



ՄԵՌԱԾՆԵՐԻ ԱՇՏԱՐԱԿ

Մեռածների թիվը աշտարակ է բարձր,
Որտեղ ապրում ենք մենք
Մեր չլիզված հոգու մեռակությամբ:

Ծնվողները ճերմակ երամներով
Բարձրացնում են երկինք:

Ժամանակի բոլոր աստվածները
Իրենց ոտքերի տակ
Բարձրացնում են այդ սև աշտարակը,
Բարձրացնում են այնտեղ,
Ուր մութ հոգիների խլությունն է երգում,
Բարձրացնում են կյանքի ցավոտ մի տքնությամբ
Ու խուլ ճարճատյուն է լսվում տիեզերքում:

Մեռածների թիվը բարձր աշտարակ է,
Որ թե Բաբելոնի աշտարակի նման փլվի հանկարծ՝
Բոլոր ժպիտները,

Բոլոր արքաները,

Բոլո՛ր, բոլո՛ր, բոլո՛ր աստվածները կթափվեն

ցած,—

Աստվածատիպ այրեր կելնեն անդունդներից,

Աստվածատիպ երգեր կփայլակվեն մթում՝

Որ ստեղծեն դարձյալ Աշտարակ ու Աստված:

Եվ անապատի ավազների պես
Տարիներն իրենց տեղերն են փոխում
Մերկ, նարնջագույն հարթության վրա:

Ո՛վ է հաջորդում ու դառնում անցյալ,
Ո՛վ է կրկնվում անընդհատ, անվերջ
Այս միապաղաղ հավերժության մեջ:

Երբեմն գույծով
Մերկ անապատի ավազների պես
Մերկ տարիների մորիկներ են խենթ
Բարձրանում երկինք,
Կրկնում են իրենց պատմությունը հին
Եվ ընկնում ջարդված
Այն տարիների կողքին, որ երեկ
Բարձրացել երկինք ու ընկել էին:

Սփոռացների տակին պահված սեղանների վրա
Ժամանակը բախտի խաղաթուղթն է բացում.—
Խառնակույտ է՝

Քամին

Անհնազանդ երգով լցված գավաթներից

Հանում է դեմք,

Գլուխ,

Մի պղպջակ-արկած,

Եվ ամեն մի բացվող խաղաթղթի տակին

Պարտվողների անշունչ մի բանակ է պառկած:

Մեզ խտուտ են տալիս.— Գ
Ծիծա՛ղ, ծիծա՛ղ, ծիծա՛ղ:
Ծիծաղ մարդո՛ւն, հողի՛ն, ջրի՛ն.
Քանզի այդպես է միշտ՝
Ծիծաղը դարձնում է մեզ ապակի,
Եվ ցավի մի հարվածով
Մեզ փշրելը դառնում է զարմանալի դյուրին:

Ժիծաղի ճերմակ ամպեր են լողում
Կապույտ տխրության անհունի վրա,
Եվ նրանց հեռու արձագանքն ահա
Գունատ շրթերիս վրա է շողում:

Երկինքն այնքան մե՛ծ,
Ծիծաղն այնքան շա՛տ.—
Հոգնած հոգուս մեջ ո՞վ է խլրտում,
Որ բարձրացնի թևերս ուժատ:

Երկինքն այնքան մե՛ծ,
Ձյուներն այնքան շա՛տ.—
Էությանս մեջ
Կապույտ աստղեր են անվերջ թափտում:

Մեր հոգիներն անույս ու կույր լապտերներ են,
ճոճվում են՝

Առաստաղից ներքև դատարկության,

Չգտնումի վայելքն օրորելով:—

Պատերի մեջ թաղված,

Թախծից ժանգոտվում են

Լույսի կոճակները:

Վանգնած չեն տանիքները —
Նրանք նստած են պատերի վրա:

Կանգնած չեն պատերը —
Նրանք նստած են հողի վրա:

Եվ հողը նստած է մեռածների մարմինների
վրա:

Պատերը պտտվում են շուրջս:
Զարմացած երգերը մեխվել են սյուների նման:
Թախիծը երկինք է դարձել,
Ապրելու երգեր է հանկերգում:

Փշրեցեք ձեր ներսում եղած պատերը,
Եվ ազատ,
Եվ ավեր մի աշխարհ կունենաք ձեր հոգում:

Ժ Երունին ձեռքով խփում էր ժայռին
Ու նայում էր վեր՝
Երկնքի՛ն արդյոք, թե՞ թռչող հավքի:

Ծերունին ձեռքը խփում էր ժայռին՝
Ճաք տված մի սիրտ
Ինչպե՛ս կտանի
Այսքան կարոտներ
Այսքան ամայի:

Ծերունին ձեռքը խփում էր ժայռին.—
Երբ ծերուկ չկա ու էլ ժայռ չկա.
Ինչ կուզես, արա.—
Տաք զառանցանքով հալվում էր ժայռը
Եվ հավք ու երկինք իրար հակառակ
Պտտվում էին աշխարհի վրա:

●

Աստղեր են իջնում:

Լոռւթյան վրա փայլող անուրջի ոտնահետքերից
Ծնվում են սիրո և մոռացության

սյուները մեկ-մեկ.—

Դատարկությունը լցնում են այսպես

Հավիտյան արծակ անապատներում,

Թե լինում են ուղտ

Եվ մի քիչ երազ ու հավերժություն

Պահած են լինում դեռ սապատներում:

●

Եվ կատուներն իրենց լակոտների վրա
Նկարում են պատկերներ գիշեր ու ցերեկվա,
Պատկերներ երկնքի,
Աստվածների,
Հողի,
Նկարում են թեթև, արծաթափայլ դողոց,
Եվ փոքր-ի՜նչ թանկարժեք դարձնելու համար
Նկարում են աչքեր
Ու շարտում փողոց:

●

Թիթեռները:

Կախվում են օդի մեջ

Ու թարթվում են մանկան աչքերի պես:

Եթե թմբուկն այսօր տալիս են քեզ,

Կանչիր թիթեռներին,

Եվ մի օրվա կյանքի խնդությունը

Կատարյալը դարձրու:

●

Փողոցների մեջ մեխված ձայները
Շարժվում են նորից.
Եվ աղմուկներ են թարտում էլի,
Որ կամաց-կամաց ահագնանալով՝
Ցնցում են հողը
Մի խորհրդավոր, անթափանց խորից.—
Այդ խորքն իր խորքից հեռու-հեռավոր
Հարազատների ձայներ է բերում.
Մի մանուկ ընկած նրանց ետևից
Վազում է դեպի անվախճան հեռուն:

●
Ես անհնազանդ մնացի դարձյալ:—

Հրդեհումների վայելքի առջև համրացա նորից,
Խելահեղորեն ծամեցի իմ թանկ հառաչանքներս,
Որ ապաքինում չբերեցին ինձ:

Նախամարդու իմ ժանիքը գրկած
Հոգնած քայլեցի,

Նախամարդու իմ ժանիքը գրկած
Մեխվեցի ժայռե ճակատների մեջ,
Սակայն քայլերս մնացին տարտամ,
Ինքս մնացի բեռիս տակ կքած:

Եվ անհնազանդ, ազատ մնալով նախամարդու
պես,

Նախամարդու պես երկինքներ առա,
Ու թարթիչներով թմբկահարելով
Կապույտ ամպերի թմբուկները խուլ,
Ես ճամփով ինձ հետ
Ծաղկած կարոտի մի մորճիկ տարա:

Ցավի հատակին պառկած էի ես՝
Ականջս կյանքի խառն աղմուկների
Քաշքշուկի մեջ,
Եվ անարգանքի խարույկի վրա
Այրվում էր հոգիս
Կախարդված թռչնի առասպելի պես:

Ցավի հատակին պառկած էի ես,
Երազում էի ծաղկաբույր մի ձեռք,
Որ մի ակնթարթ փակեր ականջս,
Ու դրախտի մեջ հայտնվեի ես:

Ռեռ հոգնած էի
Դատարկ շշերի հավիտենությամբ:
Օվկիանոսներում փնտրում էի ես
Իմ աչքերը, որ կորցրել էի
Ճերմակ գետերի սահանքների մեջ,
Ես փնտրում էի շուրթերիս մեզը՝
Ժայռերին ծեփված արևի վրա,
Շուրթերիս մեզը, որ գուցե հիմա
Առաջվա նման էլ չի դողդողում,
Եվ երկինքներում ես փնտրում էի
Իմ բաց թևերը,
Որ գազաթների վրա մնացին,
Թևերը ինչպե՞ս կթաղվեն հողում:

●

Առավոտն իր ձեռքերը
Թրջում էր ակունքներում.
Եվ օրհնանքը հողի՝
Թեթև մի մառախուղ՝
Բարձրանում էր երկինք:

Երազանքները ուտոստում էին
Հողում երկնասույգ,
Զորավոր ձեռքով երեկոն մուծը
Սեղմում էր հողին
Եվ ակունքները ճառագում էին
Ջերմություն ու լույս:

●

Երկու հորիզոններ.—

Մեկը լեռնաշխարհի ոտքերով է անցնում,

Մյուսը՝ բարձրագնա գագաթներով:

Այն, որ լեռնաշխարհի ոտքերով է գնում,

Այնտեղ սովորական, երբեմն շատ սիրելի

Մարմիններ են թաղում:

Գագաթներով թռչող հորիզոնի վրա

Կյանքը օլիմպիական աստվածներ է պեղում.—

Ես կանգնած եմ այս զույգ հորիզոնի միջև

Եվ լեռների առջև խունկ եմ ծխում:

—

●
Խաւարի փափուկ ատամների մեջ
Փայլում են լույսի ստվերները թեք,
Եվ խուլ ձայների խուլ աղմուկներում
Խուլ հանճարներ են փայլփլում մեկ-մեկ:
Եվ խաւարը խուլ գետերի նման
Մի աննպատակ ճամփա է գնում,
Խաւարի թանձր գետերի վրա
Անցորդի համար
Լույսերի փոքրիկ կամուրջ է մնում:

Անհայտ կորածի տանջալի հույսով
Հին հեքիաթներ եմ պատմում վերստին
Եվ այս լեռներում էլ չեմ հավատում
Ոչ ուրիշների, ոչ էլ իմ ստին:
Անհայտ կորածի տանջալի հույսով
Սառն այս խավարում ես փնտրում եմ քեզ—
Ճերմակ գորտեր են թռչում մթի մեջ,
Եվ հողն է դողում իմ ոտքերի տակ
Անաստղ, անլուսին երկնքի պես:

Մատներիս մեջ ահա, մատներիս մեջ
Պլպլում է հոգնած մի գլանակ՝
Մի մեծ մոմի հանգույն...

Ճերմակ մոմեր-դեղին, դեղի՛ն-անգույն,
Դեղին մոմեր-հարսանեկան ճերմակ
պատրանքների վրա.—

Այս երեկո դարձյալ ես հեթանոս եղա.
Ես հարսնախոս եղա ու փեսացու...
Օ՛, մեղա քեզ, Մարիա՛մ, մեղա՛, մեղա՛...

●

Կեսգիշերային խոր լռության մեջ
Կտրտվեց, կորավ հեռավոր մի ձայն.—
Այգին փշրվեց մեր ոտքերի տակ
Եվ տերևների արյունը խշշաց
Դեղին խշշոցով:
Երազների պես
Փշրված երկնի կտորներ իջան մեր մերկ
ուսերին,
Եվ անհանգրվան ստվերների չուն
Վառվեց մերկության սպիտակ բոցով:

Ինչ-որ բան դարձյալ ծնվեց Ոչինչից...

●

Քրքրում եմ խոհերս ամենօրյա,
Քրքրում եմ ձյան պես.—
Քնեցրու թախիծը ճերմակ ձյունների մեջ:

Ճմուռն եմ իմ խոհերն ամենօրյա,
Իմ ձեռքերի նման, ձեռքերիս մեջ.—
Քնեցրու թախիծն իմ ձեռքերի վրա:

Քրքրում եմ խոհերս ամենօրյա,
Քրքրում եմ լքված ամբոխի պես.—
Քնեցրու թախիծն ամբոխի մեջ:

Քնեցրու սարսափն ամենօրյա,
Այս սարսափի սարսուռն ամենօրյա՝
Խոհերիս մեջ, իմ մեջ, ձեռքերիս մեջ:

●

Ա Եդրաշխարհից հանած հսկա մի ցավ՝
Հովհաննու գլուխն է այդ.—
Խոռոչները մուր-մուր ծիծաղների Քարոնական

մորիկ:

Ծիծաղիր, Սալոմեդ իմ, ծիծաղիր,
Քո ափերում հալվում է փրփուրն իմ ցավերի,
Քո կրծքին ծաղկում է քրքումն իմ ցավերի
Եվ քո կրծքի միջից մեկը հարվածում է գլխիս:

Յուրտ լեռների վրա
Քարե պինգվիները
Աստղեր են հավաքել
Ու խարույկ են անում: ~~տե~~
Ձեռքերս մրսում են ցուրտ լեռների վրա.
Կակաչների բոցը քամին ո՛ւր է տանում:

Անդունդների վրա, անդունդների վրա,
Հազար միլիոն տարու անդունդների վրա
Քո ձեռքն իմ աչքերից
Կանքե՛ր, մենաստաննե՛ր,
Մուլթ խորաննե՛ր, ջահե՛ր,
արցունքնե՛ր է հանում:



Գետը խավարի շուրթերի միջից
Թափվում է բարձր կամարների տակ:
Շառաչումի ողբ: Կարոտի ցավեր:
Տուր ինձ ձեռքերդ և հոսիր իմ մեջ,
Իմ մեջ կամարներ կան անձեռակերտ՝
Հավիտյան ավեր:

Մի վայրկյան հետո
Հին վայրկյանները կկրկնենք մեկ-մեկ՝
Մենք մեր խոսքերի անտառների մեջ
Կաղնի կփնտրենք՝
Ոսկեղեն խարիսխ,
Եվ մեր փնտրումի մացառները սուր
Կարյուճոտեն մեր տոտիկները մերկ:

Անցած օրերը գիշերվա կրծքին
 Լապտերների պես քայլում են անգույն,
 անանուն, անէ,
 Եվ քո աչքերի սև հողմը լոխ
 Իր խղապարով հեզնում է կարծես
 Քեզ կորցնելու վիշտս կապարե,
 Քեզ չեմ գգվելու,
 Չեմ գտնելու քեզ,
 Քեզ չեմ սիրելու,
 Քեզ չեմ ատելու,
 Այլևս չկաս
 Իմ ընթացքի մեջ հավիտենական:

●

Քո շեկ մազերը ամփոփել ես դու
մի սև լուսնի մեջ,
Եվ իմ ափերին կաթում է ահա
Քո անչար մարմնի խոնավ մեղեդին.—
Շուրթերիս վրա հալվում են մեկ-մեկ
Բոլոր անծանոթ երգերը խրթին,
Եվ մեկն իմ ու քո միաձուլլ ձեռքով
Բիրտ հարվածներ է մեխում իմ սրտին:

Մութը տրտմության պես կաթիլ-կաթիլ
Վաղնջական սիրո արձագանքն էր երգում
Մենակ հոգիների ստվերների վրա:

Եվ գիշերը հանկարծ պայծառացրեց մի լույս,
Որ կորել էր միգում մի հեռավոր ճամփի.—
Ես իմ թարթիչներով գրեցի քո անունը
Մի սև քարի վրա
Ու թուլեցի մի գորշ հողաթմբի:

Բա՛ց, դուռդ բաց արա,
Բնագդն ինձ շուտ տվեց կանաչների վրա.
Ծառի արմատներից
Պաղ խշշոց էր ելնում նրա մարմնով վերև
Եվ թափվում էր տաք-տաք տերևներից:

Բա՛ց, դուռդ բաց արա.—
...Հետո ծմեռ եկավ
Ու ճերմակ խուփ դրեց
Կապույտ խշշոցներով քլթքլթացող
Ծառաշխարհի վրա:

Բա՛ց, դուռդ բաց արա,
Ձեռքերդ դիր վրաս,
Եվ թաղիր ինձ հողում,
Որպես արձագանքով լցված անհուն կարաս:

ԽՈՍՏՈՎԱՆԱԳ

(պոեմ)

ՆԱԽԵՐԳԱՆՔԻՅ ԱՌԱՋ

(մոր աղոթքը)

Փառք տուր աստծուն, փառք տուր աստծուն,
Որ արեգակ ելավ կրկին.

Փառք աշխարհքին,

Որ ինչ-որ տեղ

Դեռ աղ ու հաց ունի ձեռքին:

ՆԱԽԵՐԳԱՆՔ

Այն պատկերը մաքուր,

Որ երկնքում անհուն

Ամպերի հետ դանդաղ

Արևմուտք էր սահում,

Այդ պատկերը ինչպե՞ս

Համատարած ու մեծ,

Այդքան թեթևորեն

Իր անյունից պոկվեց

Ու վերևից ահա,

Անտազնապ ու հանդարտ

Ամպերի մեջ զնգուն,
Իր հայացքով անթարթ,
Նայում էր մեզ հանգիստ,
Որբուկներին մեր խեղճ,
Մենք՝ գլխահակ ճամփորդ,
Ինքը բուքն էր մեր մեջ,
Մենք՝ որբ սգավորներ,
Ինքը սուգն էր մեր մեջ:
Նայում էր մեզ հանդարտ
Իր երկնային գահից
Եվ երկնքից երկիր
Անջատված էր մահից:

Եվ հետո, երբ տխուր
Խաչքարերի միջով
Անցնում էին մարդիկ
Դառը ողբ ու ճիչով,
Լսում էի կարծես
Կորստյան սուր կանչեր՝
Ընկնում էին մարդիկ,
Ծնվում էին խաչեր:
Եվ ամեն խաչ այնտեղ,
Որ կանգնած էր անուժ,
Ինձ թվում էր կորած
Սեր մարմնավոր կյանքից
Ամենապարզ մի հուշ:

Այն պատկերը մաքուր,
Որ երկնքում անհուն
Ամպերի հետ դանդաղ
Արևմուտք էր սահում:
Այդ պատկերն ինձ այսօր
Երգի հունն է քաշում:
Իսկ երգն ի՞նչ է արդեն՝
Մի թախծալի աշուն:
Մի թախծալի աշուն,
Մի մորմոքող կարոտ,
Աստծո չեղած պատկեր
Ու չկապված նարոտ:

Եվ ես ահա դանդաղ
Երգիս հունն եմ մտնում.
Ինչպես արեգակը
Առավոտվա միջով
Առավոտ է մտնում:
Ու թեև նա պայծառ
Դեպի մեզ է հակված՝
Նրա այրված ճամփան
Կապույտով է ծածկված:—
Այդպես ճամփան երգիս
Այրված է ու դաժան,
Եվ փռված է վրան
Երազների խաշամ:

Եվ հաշտվելով արդեն
Տարիների բեռին,
Ես լուռ խորովվում եմ
Իմ ցավերի ձեռին:
Ուն որ կանչում եմ ես
Արդեն վաղուց չկա,
Ուն էլ պիտի կանչեմ,
Ի՞նչ իմանամ կգա՞:
Եվ կկանչե՞մ արդյոք,
Թե կհարցնեմ «Ո՞ տայր»,
Ինձ մայր էլ ո՞վ կտա
Աշխարհում այս օտար:
Երբ նայում է նա ինձ
Իր երկնային գահից,
Եվ երկնքից երկիր
Անջատված է մահից:
Իսկ ես մահվան ձեռքին
Թաքտում եմ, ժպտում,
Եվ ապրելու տենդից
Մեկ-մեկ մահ եմ խնդրում:

ԳԼՈՒԽ ԱՌԱՋԻՆ

Ամեն առավոտ նա դուրս էր գալիս,
Ամեն իրիկուն նա տուն էր մտնում
Եվ աշխարհի մութ առեղծվածներին
Ոչ մի պատասխան ու ելք չէր գտնում:

Ամեն օր թանձր մառախուղի պես
Կարծրանում էր նա դռան սալքարին
Եվ իր հեռավոր հուշերի խորքից
Երկար նայում էր տխուր աշխարհին:

Եվ իրիկվա հետ մթնում էր կամաց,
Եվ իրիկվա հետ փափկանում էր լուռ,
Մառախուղի պես ձգվում էր տեղից
Եվ լցվում էր իր սննյակը անբույր:

Եվ մայրը այդպես ապրում տարիներ,
Եվ տարիներով ոչինչ չէր անում,
Փակվել էր կարծես, կորել էր կարծես
Հեռու հուշերի կապույտ գնդանում:

Կիրակիներին գնում ժամատուն,
Թեքվում էր որպես աղոթքի կամար,
Երևա՛ր ու երկար շուրթերն էր շարժում
Կորած որբերի փրկության համար:

Նրա աչքերում կար անուժ տագնապ,
Եվ տագնապի մեջ՝ աղոթող թախիծ,
Որ մնացել էր պատերազմներում
Անտեր աշխարհի կործանման վախից:

Նա Աստվածամոր մոր տարիքն ուներ
Եվ հնությունը հոլովվող բառիս,
Բայց Աստվածամոր պատկերի առջև
Դեռ սարսռում էր ու կուչ էր գալիս:

Եվ որքան էլ որ աշխարհը պայծառ
Եվ հոգին լիքն է կյանքով ու երգով,
Սակայն մարդն էլի ապրում է դարձյալ
Վերապրումների ակնկալիքով:

Պատահում է՝ մի փառավոր վայրկյան
Լուսավորում է քո կյանքը անտուն,
Եվ ամբողջ կյանքում ձույլ շղթայի պես
Այդ պայծառ հուշը հոգիդ է բանտում:

Կարոտն՝ հեծյալը այդ պայծառ հուշի,
Մնացած կյանքդ փշրում է, ջարդում,
Եվ դու՝ անմոլոր աստղդ հավատի,
Դանդաղ հավիւմ ես ու չես հավատում,

Ու չես հավատում, որ ինչ-որ մի տեղ,
Իր ադամանդե խեցու մեջ փակված,
Այդ ակնթարթը էլ չես գտնելու
Քո օրերի մեջ պաղ ու անարգված:

Էլ չես գտնելու: Եվ կյանքդ, կյանքդ
Ծածկված է անհուն տրտմության խավով.—
Դու զարդարված ես կարոտով քո մեծ
Եվ զարդարված ես կորստյան ցավով:

...Եվ մայրը այսպես ապրում տարիներ
Եվ տարիներով ոչինչ չէր անում,
Փակվե՛լ էր կարծես, կորե՛լ էր կարծես
Իր մութ հուշերի կապույտ զնդանում:

Մայրը ոչ մեկին էլ չէր հավատում,
Լոկ աստըծո հետ խոսում էր երկար,—
Աստված փրկության հույս էր հաղորդել,
Դրանից հետո կորել էր, չկար:

Այսինքն՝ գոնե երևար մեկ օր,
Աստղի պես այսպես ցլանար, գնար,
Մայրն ինքը արդեն կզնգար, ինչպես
Սուրբ ճշմարտության յոթնադի քնար:

Սակայն փրկության հույս էր հաղորդել
Եվ հետո այդպես կորել էր մեկից,
Հուսահատ մայրը բան չէր սպասում
Ոչ զավակներից, ոչ սուտ աշխարհից: ✓

Իր սաղմը առատ տվել աշխարհին,
Տասնմեկ շողուն խաչեր էր ծնել,
Տասնըմեկ անգամ զարկվել էր գետին
Եվ բոլորին էլ մեկ-մեկ կորցրել:

Բայց Ավագ խաչի կորստյան համար
Նա օվկիաններով արցունք էր հեղել.—
Նա, որ անհայտ էր կորել աշխարհում,
Իր կորուստների Սկիզբն էր եղել:

Եղել էր սերն ու վիշտը առաջին,
Իր մեջքին՝ գոտի, իր գլխին՝ կամար,
Թե որ այդ մեկը մնար, չկորչեր,
Գուցե այլևս կորուստ չունենար:

Սակայն կորուստը մնում է կորուստ,
Կորստից հետո հույսն էլ ի՞նչ կանի,—
Մի հույսի դիմաց շրջում է շուրջդ
՝ Հազար տառապանք՝ հազարաչքանի:

ԳԼՈՒԽ ԵՐԿՐՈՐԴ

Մի գունատ արև հալվում է դանդաղ
Նոյեմբերյան գորշ ու պաղ երկնքում,—
Ձյունի սպասող փողոցների մեջ
Թախիծը հանկարծ իմ սիրտն է ծակում:

Ջրհորդաններից կախվում է ահա
Օջախի բույրը հարազատ հարկի,—
Հարազատներիս կարոտել եմ ես,—
Քշիր, եղբա՛յր իմ, քշիր, եղբա՛յր իմ,
Զմեռը չգա, ճամփան չփակի:

Եվ անիվները վնգում տագնապոտ,
Ուլորաններին ճոռում են ցավից.—
Մեռնող աշունը; ցուրտ նոյեմբերը
Եվ իմ կարոտը լացացնում են ինձ:

Քշիր, եղբա՛յր իմ, քշիր, եղբա՛յր իմ,
Քանի դեռ միայն իմ սիրտն է լացում,
Իմ մայրը հիմա նստել հատակին,
Գարու հատերով իմ բախտն է բացում:

Իմ եղբայրները հավաքվել հիմա
Հարսներից մեկ-մեկ ուղարկել ջրի,
Իրենք շիկացած վառարանի շուրջ
Կենացն են խմում իրենց պուճուրի:

Ճակատագիրս հայտնի չէ նրանց,
Գուցե ինձ էլ են կորած համարում.—
Հարազատներս կորցրել են ինձ
Այս փոքր ու տխուր հայոց աշխարհում:

Նրանք խմում են, բորբոքվում իզուր,
Լալով խմում են ոսկեցու գինի.—
Ողբասացների այս ցեղի վերջը,
Տեր աստված, արդյոք ի՞նչ պիտի լինի:

...Ու վրնջում է խազալում մի ձի,
Արձագանքում են լեռներ ձյունաթագ,
Գունավոր քամին մեռած գոյներով
Ջովացընում է իմ աչքերը տաք:

Ու սև ցուլերի նախիրը հեռվում
Ճոճվում է դանդաղ,
Շուրջը լցնում է բառաչի ահով.—
Ասես լավայի այրվող մի ալիք
Ելել քայլում է երկրի վրայով:

Սև ագռավների երանը երկար
Լարերին շարված ուղեկցում է մեզ,

Յուրտն ավելի է կարծես սաստկանում,
Եվ ինքըս իմ մեջ կծկըվում եմ ես:

* * *

Գունատ արևը հալվել է արդեն
Աշմանային գորշ ու ցուրտ երկնքում.—
Գյումրի քաղաքի մշուշների մեջ
✓Ախուրյան գետը սաղմոս է երգում:

Եվ ինչպես որ միշտ պատահում է մեզ,
Հուզվում ենք, նաև տագնապում անել.—
Այդքան մոտիկից,
Այդքան իրական,
Իր հուշերին իր մոտիկությունը
Միշտ չէ, որ մարդը կարող է տանել:

Եվ իրիկնացող քաղաքի վրա
Մայր եկեղեցու զանգերն են զնգում.—
Մրսած քաղաքը վազում դես ու դեն
Եվ խառնըվում է ինքն իր հոսանքում:

Հասկանում եմ ես՝ ճիշտ է ամեն ինչ,
Հասկանում եմ, որ գնում եմ ես տուն,
Բայց սրտիս խորքում ինչ-որ մի թախիծ,
Ինչ-որ անորոշ ցավ է խլրտում:

Չէ՞ որ իմը չեմ համարել երբեք,
(Եվ այդպես լինի գուցե մինչև մահ),
Այն, որտեղ հիմա գտնվում եմ ես,
Եվ այն, որտեղից գալիս եմ ահա:

Թեև մի տարտամ համակերպությամբ
Հաշտվել եմ արդեն օրերի բեռին.—
Ինչ բերել էի հանդերից գլուղի՝
Ջոհաբերեցի ցուրտ նկուղներին:

Նրանք վառեցին երակներիս մեջ
Թունդ խմիչքների խլրտումը տաք.—
Այդպես հոսում էր կյանքը իմ միջից՝
Ալիք առ ալիք, վտակ առ վտակ:

Եվ մրսում էի պաղ ձանձրույթի մեջ,
Ծանրանում էի տագնապի բեռով,
Որ ջերմանում էր հայոց մեծերի
Լուսավոր ու տաք առկայծումներով:

Քշիր, եղբա՛յր իմ, փողոցների մեջ
Իրիկնամուտի մշուշն է հունցվում,
Տե՛ս, ստվերները ծնվում են մեկ-մեկ
Հետո գալիս են իրար ագուցվում:

Այդպես կարող է իջնել մեզ վրա
Մտքերի փափուկ ու թանձր գիշեր,
Եվ այն ժամանակ չեն փրկի էլ մեզ,
Ոչ սե՛ր, ոչ կարո՛տ, ոչ քաղցր հուշե՛ր:

Եվ նորից ծնկներս ծնկներից,
Հայացքս աչքերում զառամած,
Մորս մոտ նստել եմ մանկան պես,
Բռնել եմ ձեռքերը թառամած:

Դռնակը բացել է օրվա դեմ,
Ցուրտ քամին մշուշներ է բերում,
Էլ ասեղ չեն բռնում ձեռքերը,
Խշշում են ձեռքերն իմ ակերում:

Ոչ բառա՛չ, ոչ մայր՛ւն, ոչ մի բա՛ն,
Որ լիներ մոռացում իր ցավին.—
«Բարի լույս» շնորհեք, անցորդներ՛ր,
«Բարի լույս» հավաքող պառավին:

Օրհնում է բոլորին մեկ առ մեկ,
Նայում է երկնքին ու հողին,
Եվ այն, ինչ պիտի տար իր որդոց.
Բաշխում է անցնող ու դարձողին:

«Ապրում ես, գիտեմ, որ՝ ապրում ես,
Երգերդ կարդում են: Լսում եմ:
Բայց էլի մեծակ եմ աշխարհում,
Կարոտից, տագնապից մրսում եմ:

Չգիտեմ՝ ո՞ւմ ասեմ, ի՞նչ ասեմ,
Խոռվեց իմ աստվածն ինձանից,
Ճյուղառատ ծաղկել է սրտիս մեջ
Ինչ մնաց, ինչ որ կար հին ցավից:

Քեզ ի՞նչ տամ, զավակս,
Ի՞նչ տամ քեզ...
Ի՞նչ ասեմ

աշխարհին

այս չարկամ,—

Ի՞նչ զավակ, որ իր մոր օջախում
Չկտրի մի պատառ հաց անգամ»:



Երկինքը սպիտա՛կ-սպիտա՛կ
Ամպեղեն զանգակներ է կախում,
Մայում են գառնուկներն սպիտակ
Երկնքի սպիտակ փարախում:

Երկնքի սպիտակ թևի տակ
Թռչում են թռչուններ սպիտակ,
Թռչում են, գալիս են ու... չկան,—
Նրանց հետ թռչում են անհայտում
Անգուլը, ներկան ու ապագան:

✓ «Ախր, ո՛ւր ցրվեցիք, զավակներ՝
Եվ ինչո՞ւ չքացաք աշխարհում,
Իմ տանից հանեցիք ինձ այսպես,
Արմատս թողեցիք անարյուն:

Չգիտեմ՝ ո՛ւմ ասեմ, ի՞նչ ասեմ,
Խոռվեց իմ աստվածն ինձանից,
Ճլուղառատ ծաղկել է սրտիս մեջ՝
Ինչ մնաց, ինչ որ կար հին ցավից:

Ո՛ւր բերիք, ախր ինձ ո՛ւր բերիք,
Օջախը այդ ե՛րբ է հնացել,
Տներս դարձել են մեռլատուն,
Մեռելներս անտեր են մնացել»:

Եվ հետո հոգնում է տրտունջից,
Քանի որ մնում է սրտի մեջ
Կարծրացած տխրություն մի անհալ,
Եվ վախը, որ ամեն ակնթարթ
Կարող ես թողնել ու հեռանալ:

Եվ ինքը իր ցավից կճշա,
Եվ ճիշը իր սիրտը կծակի,
Եվ դատարկ խոսքեր կըխշխշան
Աշխարհում ցավի ու փորձանքի:

Եվ հանկարծ ելնում է իր տեղից,
Ժպտում են աչքերը պառաված,

Եվ մեկ էլ տեսնում ես, որ ահա
Ցավը սեր և սերը դառավ հաց:

Լցնում է գավաթներն օղիով,
Աչքերը սրբում է մշուշից,
Եվ նորից մի կյանքի զորությամբ.
Հառնում է փշրանքը հին ուժից:

Օրհնում է աստըծո օրհնանքով,
Օրհնում է բառերով զրընգուն.—
Ի՛նչ բառեր, աստված իմ, ի՛նչ բառեր,
Փնտրել ու չեմ գտել ողջ կյանքում:

* * *

Բաց դռան արևկող քարերին
Մեր թաղի կանայք են նստոտել,
Նրանք, որ զրուցում են արդեն,
Սակայն դեռ զրույցը չեն գտել:

«Ուրուրներ, ուրուրներ-պառավներ,
Զավակս իմ տանն է, նայեցե՛ք,
Ուրուրներ, ուրուրներ-պառավներ,
Զավակս՝ աստծո փրկող ձեռք»:

Եվ կրկին խմում ենք մի գավաթ,
Մեր շինած աշտարակն ենք փլում,

«Մեռելներս անտեր են մնացել»՝
Արցունքի ակներն են գլգլում:

«Կգնաս, գիտեմ, գլուղ կգնաս,
Կայցելես գերեզմանը քո հոր,
Ափսոս, որ չեմ կարող գալ քեզ հետ,
Որ առնեմ կարոտներս բոլոր:

Չգիտեմ, չհաշտվեց իմ հոգին,
Ծերությունն անցավ այս բանտերում,—
Աչքերս կտանես բոիդ մեջ,
Կթողնես մեր գլուղի հանդերում:

Կգնան, կթոշեն թևավոր,
Ակներից մի պաղ ջուր կխմեն,
Կլցվեն հովերո՛վ, ձորերո՛վ,
Հանդերի բույրի մեջ կքնեն:

Եվ մի օր, երբ ես շատ կհոգնեմ,
Եվ մի օր, երբ արդեն լինի վերջ,
Աչքերիս ետևից կտանես,
Կպահես խոտերի բույրի մեջ:

Եվ եթե պատահի, որ հանկարծ,
Իմ Անհայտ կորածը ետ գա տուն, ի
Կասես, որ քո մայրը հոգնելով
Դեռ քո ծակ գուլպան է կարկատում:

Կասես որ՝ անաստված, անհոգի,
Այս երկար տառապանքն ո՞ւմ էր պետք.
Բա մարդ էլ իր ծնված աշխարհում
Կկորչի խոռված ու անհետք»:

* * *

Եվ կյանքիդ պատմությունը այսպես,
Կառչելով մանր ու մեծ հույսերին,
Եվ դաժան, և քաղցր տանջանքով
Առնում ես քո հոգնած ուսերին:

Եվ այսպես կորվելո՛վ, կորվելո՛վ
Գլխահակ քայլում ես—դեսի ո՛ր,
Երբ կյանքդ մնում է մի անհայտ,
Մի թաքուն, հեռավոր աստղի բույր:

Էլ ինչպե՞ս կարող ես չտրտմել,
Քո հոգին էլ ինչպե՞ս կհրճվի,
Երբ քո դեմ արձակված նետն ահա
Քալլ առ քալլ գալիս է քո ետքից,
Որ մի օր քո սիրտը մխրճվի:

Քո նե՛տը, քո նե՛տը—ահա՛ նա,—
Ջրնգուն թռչում է ու թևում,
Եվ դու միշտ պահվում ես ժպտալով
Կարոտիդ, հույսերիդ ետևում:

Պահվում ես, բայց մեկ է, կգա նա
Եվ մի օր սրտիդ մեջ կցցվի,
Նա քեզ դուրս կբերի Անհայտից,
Եվ հետո աշխարհը երջանիկ
Քո աստղի բուրմունքով կլցվի:

ԳԼՈՒԽ ՉՈՐՐՈՐԴ

Գնահ: Ուր որ է՝ ճերմակ շուկով
Չյունն իջնելու է՝ կիրճերը փակի,
Եվ տխրությունս սպիտակ շուքով
Կփայլի որպես աստղոտ ապակի:

Բքի մեջ վայող ամեն մի հնչյուն
Էությանս մեջ արձագանք կտա,
Հուշերիս հովտում բուխարին մեր տան
Փափուկ կարոտով լուռ կկայծկլտա:

Եվ ես բուխարու ետևից ընկած,
Նրան վերստին գտնելու հույսով,
Պաղ ձյունների մեջ գուցե թե սառչեմ,
Եվ իմ անցյալը չի լուսավորվի,
Արծաթ ձյունների սառնաշունչ լույսով:

Բայց ինչ եմ ասում, ո՞ւմ է հարկավոր
Իմ անցյալն անհույս, անդուլցազնական,
Իմ անցյալի մեջ ի՞նչ երազներով,
Ո՞վ է փնտրելու իր կույր ապագան:

Չէ՛ որ բոլորս աշխարհ ենք գալիս
Եվ կույր վազում ենք մենք մեր ետևից,
Մեր երազներին փայլ է խառնվում
Անցյալի ուրախ-տխուր գետերից:

Գնամ: Ուր որ է՝ ճերմակ շշուկով
Ձյունն իջնելու է՝ կիրճերը փակի,
Եվ տխրությունը սպիտակ շուքով
Կծածկի բույրը իմ հին տնակի:

Հիմա խոր աշնան լույսն է օրորվում
Մանիշակագույն ճանապարհներին,
Գնա՛մ, քանի դեռ հավատում եմ ինձ
Եվ իմ շալակած հույսերի բեռին:

* * *

Այս ճանապարհը ինձ ամեն անգամ
Դարձնում է այսպես անիմանալի,
Նա և փականք է դառնում ինձ վրա,
Եվ ինձ իմ ներսը տանող բանալի:

Կուրծքս այնպես է ուռչում հուզմունքից,
Թևերս այնպես են մարմինս գրկում,
Որ կարծես մեկը կործանում է ինձ,
Եվ կործանումից մյուսն է փրկում:

Իմ կորուստների հեղեղը վայրի
Խեղդվելով, ցավով իմ կուրծքն է լցվում,
Հոգիս շարժվում է հրաբուխի պես,
Մայր ցամաքի պես մարմինս է ցնցվում:

* * *

Թող գիշերը գա, թող մութը մաղվի,
Թող շուկները համրանան կամաց,
Հովիվ լուսինը թող հաշվի դանդաղ
Աստղերի հոտը՝ խավարին գամած:

Թող մարդիկ քնեն,

Թող կյանքը քնի, -

Թող խաղաղություն լինի ամենուր,

Քամին լեռնացած սրբերի փնջից,

Թող բերի խոտի և աղոթքի բույր:

Գիշերվա փափուկ կուրծքը ճեղքելով,

Թող գյուղի գետը սաղմոսի թախիծ,—

Ես սարսռում եմ իմ մանկության հետ

Ճակատ առ ճակատ հանդիպման վախից:

Թող փափուկ քնի և շնչառության

Մշուշը ծխա գյուղի փարախից,

Ես դողդողում եմ իմ մանկության հետ

Ճակատ առ ճակատ հանդիպման վախից:

Ես օտարացած չեմ ուզում զգալ:

Իմ որբ մանկության կրկնությունն եմ ես.—

Ես մանկան նման գյուղ պիտի մտնեմ, —

Ինձ պիտի նայեն օտար մարդու պես:

Ողջագութանքներն, աղմուկներն ամեն
Իմ սրտի խորքում ոչ մի տեղ չունեն,—
Լուռ փողոցները, լուռ տնակները
Եվ իմ պապերի
Գերեզմանները թող ինձ ողջունեն:

Թող ինձ ողջունի իմ տնակը հին -
Եվ Վանքաձորի հովը բյուրառու,
Որ իմ տխրության ու ցավի պահին
Ես չմոռանամ շոյանքը բարու:
Եվ եթե հանկարծ գիշերը քնեմ
Եվ առավոտյան արթնանամ քնից,
Իմ տունը բարի անարատությամբ
Ինչ որ եղել է, թող կրկնի ինձ:
Թող բացի մեկ-մեկ անցած, գնացած
Պատմությունների թելերը ոսկի,
Որ իշխանական իմ երազները
Պատմունճան հագնեն հարազատ խոսքի:
Այդ պատմություններն անցյալի մասին
Ես խոնարհաբար կլսեմ հլու,
Քանզի անցյալը տիեզերական
Իմ ապագային մոտ է ավելի՝
Շուտով ես էլ եմ անցյալ դառնալու:

Այս տառապանքը երկարում է շատ,
Եվ իմ սրտի մեջ
Մեկը անընդհատ լալիս է, խոսում,
Եվ ինձնից առաջ ընկնելով՝ անվերջ,
Գիշերվա միջով մեր տուն է հոսում:

Իսկ տունն անցյալի հուշերի վրա
Ննջում է արդեն տրտմությամբ իր հեզ.—
Ես իմ մանկության ետևից ընկած,
Գնում եմ մոլոր երեխայի պես:

Իմ մանկության դեմ մոլոր է մնում
Հասունությունը իմ անօգնական,—
Հին փշրանքներ են զարդարում հոգիս,
Կրակներ՝, բույրե՛ր, երազներ չկան:

Եվ գլուղը հանկարծ ցուլում է իմ դեմ՝
Ծանկապատների քարե կարերով,
Մեր տունը և իր ցանկապատը հին՝
Կապույտ բազալտի անտառ քարերով:

Ամեն բան մեկից զնգում է հանկարծ,
Արծաթ ձայներ են երկինք համբառնում,
Այդ փոքրիկ տնից, մոռացված տնից
Վստվածաշնչի բուրմունք եմ առնում:

Խոտերը արդեն չորացել վաղուց
Եվ խշխշում են քար-քոճի մեջ,
Հավերը տապ են պրել խոտերում,
Քնել են այդպես իրենց վեճի մեջ:

Կովերն՝ արարման գայթակղությամբ,
Տաք գոմերի մեջ արոճ են անում,
Եվ աշտղերի տակ հավիտենական
Այս պատմությունը դեռ չի վերջանում:

Եվ շշուկների բույրը հեռավոր
Հարության նման օրորում է քեզ,
Եվ այս ամենը քաղցր է ու մոտիկ՝
Խաղաղությանը հավատալու պես:

Խաղաղությանը հավատալու պես,
Խաղաղության մեջ ապրելու նման,
Ուր որ ծաղկում են աչքերիդ խորքում
Երջանկությունը ու սերը լման:

Այո՛, բայց չէ որ ես գիտեմ հիմա,
Որ մանկությունս կովի մեջ անցավ,
Ոչնչացնում էր պատերազմը մեզ,
Խեղդում էր, բայց և... չկարողացավ:

Այդ անաստվածը լուռ դաժանությամբ
Կովի էր հանել անգամ խոտերին,
Նրանց բազմամբոխ թրերի վրա
Որբերը պիտի արյուն որեփն:

Ու որքան ավեր, ու որքան սարսափ
Թափվեց մեզ վրա մարդկանց ոհմակից.—
Բայց խոտերը մեզ բարեկամ դարձան,
Անասունները եղան կարեկից:

Եվ նրանց ձայնը կանչում է հիմա
Բուլրի ու ցավի թավշե ղողանջով.—
Աշխարհում մի տեղ լցված է դարձյալ
Հավիտենության կանաչ կարկաչով:

* * *

Որքան էլ դառը, հուշերն անցյալի
Ցոլում են որպես մաքուր արծաթներ,
Նրանք անցյալի տխրության վրա
Ցրված են որպես լույսի բացատներ:

Ահա քայլերս տանում են ինձ տուն,
Ահա ես դուռը թակում եմ կամաց,
Եվ դռան կողքին կախված բուրում է
Ճերմակ տոպրակում մածունը քամած:

Հոգնած քնել են, չի լսում ոչ ոք,
Ես բարձրանում եմ գլխատան տանիք,
Տանիքի վրա բույր է ճառագում
Օշինդրների մի մեծ ընտանիք:

Կամաց թեքվում եմ երդիկի վրա,
Տունն ասես լինի մթակոխ կարաս.—
Եվ ցուրտ օրերի անցյալը հանկարծ
Ահ ու սարսափով իջնում է վրաս:

Տագնապը հեռվից գալիս խշշալով
Եվ փշրվում է աչքերիս առաջ,
Հեռու-հեռավոր գիշերվա կեսին
Լսում եմ կովի մահագույժ բառաչ:

Գիշերվա կեսին լուսնյակի վրա
Հուշերով տարված թող շունը հաչի,
Բայց ո՞վ է տեսել խաղաղ քնի մեջ
Գիշերվա կեսին կովը բառաչի:

Եվ խուլ ճողալով ջարդվում են մեկ-մեկ
Երդիկին մեխված թևերը խաչի,
Սև տագնապի մեջ ցնցվող ձեռքերում
Ալլանդակվում են ձևերը խաչի:

Իմ պապերի սուրբ օջախի վրա
Երկնքից քարե կարկուտ է տեղում,
Եվ խաչերկաթը փշրվում է խուլ
Թոնիրը լցվող քարե հեղեղում:

Իրար ետևից ընկնում են խաչեր,
Սրբություններ են ոտնատակ լինում,
Մայրս թախտի տակ հավաքում է մեզ
Աղոթք-անեծքի խոսք է կրկնում:

Եվ կովը դարձյալ բառաչում է խուլ,
Մեր միակ հուլսը բառաչում է, Տեր,
Աղաղակում է մայրս ողբաձայն
Եվ արձակում է անեծքի նետեր:

Եվ անիծում է բախտ ու պատերազմ,
Եվ անեծքի մեջ թույն է ներփակում,—
Եվ կատաղության շանթն է որոտում
Խուլ սարսափների խավար ծմակում:

Մայրս եղանը պարզում է վերև, ^
Ձայնին խառնվում է բառաչը կովի.—
«Շո՛ւն,—գոռում է,— շո՛ւն, քո սիրտը, ո՛վ շուն,
Իմ թոնրի շրթին պիտի խորովվի»:

* * *

Պարզ է, քաջերը կգան ճակատից,
Պարզ է, կկտրեն ականջը այդ շան,
Բայց թե խաչերը կմնան ջարդված,
Կշարունակվի սարսափը դաժան:

Եվ կմեծանան որբերը մի օր,
Եվ չեն հավատա իրենց տեսածին,
Եվ չեն իմանա, թե ի՞նչ պատճառով
Վախ է խառնված իրենց սուրբ հացին:

Իսկ գիտունները կխոսեն երկար
Եվ կամբաստանեն աստըծուն ռազմի,
Եվ պատերազմի դեմ բարբառելով
Կմղեն մարդկանց նոր պատերազմի:

* * *

Ինձ մեկը ասես ծեփել տանիքին,
Օշինդրների բույրի մեջ թաղել
Եվ թողել է այս պարզ լուսնյակի տակ՝
Որպես տրտմության անտերունչ աղեղ:

Երկար նայում եմ երդիկից ներքև,
Խավարը սեղմող աչքերս են ցավում,
Ահա լույսի հետ արթնանում մայրս
Եվ լույսի նման շարժվում է ահա
Հեռու հուշերիս խավար անձավում:

Ելնում է տանից, լաչակը հանում,
Արեգակի դեմ արձակում գոտին,
Ծունկի է գալիս, կուրծքը բաց անում
Եվ աղաչանքի խոսք է մրմնջում
Ծնվող մանկանն ու մայր առավոտին:

Առավոտի պես մաքուր է կուրծքը,
Որտեղից արևն իր կաթն է ծծում.—
Մայրս ձեռքը մեկ խփում մայր հողին,
Մեկ էլ տառապած մոր կուրծքն է ծծում:

Մայրս ձեռքը մեկ խփում մայր հողին,
 Մեկ էլ տառապած իր կուրծքն է ծեծում,
 Քանդում է մազերն արեգակի դեմ,
 Աղոթքի, ցավի խոսք է հեծեծում.

«Չարդ բարուց
 Պոկող աստված,
 Սուտը ճշտից
 Զոկող աստված,
 Հուլսի շիվեր
 Տնկող աստված,
 Զրկող աստված,
 Զարկող աստված,
 Ցավն ամոքող
 Անքող աստված,
 Իմ խաչերի
 Փրկված թևով
 Փակված, փակվող
 Դռներս բաց:

Բաց արա, Տե՛ր,
 Չեմ համբերում,
 Խղճա գոնե
 Այս որբերին,
 Ո՞ր հանցանքիս
 Համար ինձ, Տե՛ր,
 Դարձրիր այս

Ցավի գերից,—
Կամ որբերիս
Ինքդ պահիր,
Կամ ինձ տուր իմ
Ավագներին:

Ջավակներիս
Համար անտեր
Հալալ արա —
Կաթն իմ արդար,
Կամ ինձ էլ, Տեր,
Ի՛նձ էլ, ի՛նձ էլ
Այս աշխարհից
Վերցրու, տար:

Անթիվ որբեր
Կան աշխարհում.—
Բոլոր փակված
Դռները բաց.
Չարը բարուց
Պոկող աստված,
Սուտը ճշտից
Ջոկող աստված,
Ջարկող աստված,
Ջրկող աստված...»:

Եվ աստըծո հետ կովելով անվերջ,
Մալոը ողջ օրը դեսուդեն վագում,
Հոգսերի ճանկից փեշը թափ տալիս
Եվ կալերի մեջ արցունք էր կախում:

Իր որբուկներին հավաքում կամին,
Եվ բութ աշխարհի պտույտի հանգով
Կորստյան նավը քշում էր այդպես
Տանջանքի, հույսի դեղին ճամփեքով:

* * *

Երեկոյան մութը դավով
Երդիկից տուն էր լցվում.—
Թոնրին դրած քուրսու վրա
Հացի սեղան էր բացվում:

Խմում էին որբերն անգետ
Կանաչի ջուրը աղի,
Որ կրծքները փափուկ մնա,
Աչքներին մութ չմաղի:

Քուրսուն դրած լամպի լեզուն
Ապակու մեջ թրթռում
Մորս միտքը գուշակության
Մութ աշխարհն էր հրթիռում:

Տետրի թուղթը ոլորում էր,
Դընում լամպի ապակուն
Եվ կանչում էր աղաչանքով
Ոգիների պարսն անքուն:

Կանչում էր նա հրեշտակներին,
Աստվածներին, դևերին,
Որ իր որդուն գոնե մի պահ
Բերեն իրենց թևերին:

Թրթռում էր ապակու մեջ
Բոցի տանջանքը ոսկի.—
Շշնջում էր մայրս բոլոր
Աղաչանքները խոսքի:

Անարձագանք լուռության մեջ
Քարանում էր ամեն բան,
Բոցը հանկարծ ճեղքվում մեկից
Եվ հայտնվում էր ճամփան:

Ավագ խաչը գալիս հոգնած,
Պաղ աղբյուրին կռանում,
Լվանում էր դեմքը փոշոտ
Եվ երկա՛ր չէր հեռանում:

Նստում այրված խոտերի մեջ,
Բացում էր կուրծքը քրտնած,
Նայում էր գորշ ճամփաներին
Եվ երկնքին սփրթնած:

Եվ հետո հանկարծ սև-սև տանկերի
Շարասյունները անցնում դղիրդով
Ավերում էին պատկերն աշխարհի
Կործանում էին ամեն բան հերթով:

Ռումբը պայթում էր, ականը վայում,
Կյանքը դառնում էր կրակի բաժին,
Կործանումների տխրության վրա
Երկնքից երկիր կանգնում էր փոշին:

Փոշին ծածկում էր երկիրը ավեր,
Փոշին ծածկում էր ամեն բան մեկից,
Եվ Ավագ խաչը կորչում էր այդպես
Անհայտության մեջ և անկարեկից:

Իր Ավագ խաչի կորստյան ցավից
Մայրն օվկիաններով արցունք է հեղել,
Նա, որ անհայտ է կորել աշխարհում,
Իր կորուստների Սկիզբն է եղել:

Եղել է սերն ու տանջանքն առաջին,
Իր մեջքին՝ գոտի, իր գլխին՝ կամար,
Թե որ այդ մեկը մնար, չկորչեր,
Գուցե այլևս կորուստ չունենար:

Սակայն կորուստը մնում է կորուստ,
Կորստից հետո հույսն էլ ի՞նչ կանի,
Մի հույսի դիմաց շրջում է շուրջդ
Հազար տառապանք՝ հազարաչքանի:

Փոշին ծածկում է երկիրը ավեր,
Փոշին ամեն բան ծածկում է մեկից,
Եվ ականջիդ մեջ մնում է միայն
Ձայների ճիչը կյանքի դժոխքից:

Եվ աչքերիդ մեջ մնում են միայն
Խուլ սարսափների անքուն կրակներ,
Եվ հոգուդ խորքում քնում են միայն
Երազանքների ոսկե փշրանքներ:

ԿԵՐՋԵՐԳ

Նձ մեկը ասես ծեփել տանիքին,
Օշինդրների բույրի մեջ թաղել,
Թողել է բացվող երկնի տակ ընկած,
Որպես տրտմության անտերունչ աղեղ:

Գնա՛մ, ուր որ է՝ ճերմակ շշուկով
Չյունն իջնելու է՝ կիրճերը փակի,
Եվ տխրությունս, սափտակ շուքով,
Կփլվի՝ որպես աստղոտ ապակի:

Իսկ նա, որ գնաց աշխարհից անտեր,
Եվ նա, որ ոչինչ չունեցավ կյանքում,
Հիմա երկնքից Աստվածամոր պես
Իր որբ խաչերին հսկում է անքուն:

Հսկում է անվերջ, հսկում է անքուն,
Իր տանջանքները աշխարհին թողած,
Եվ հիմա՛, հիմա՛, հենց այս վայրկյանին
Նրա աղոթքն իմ շուրթերին շողաց.

Փառք տուր աստծուն, փառք տուր աստծուն,
Որ արեգակ ելավ կրկին,
Փառք աշխարհքին,
Որ ինչ-որ տեղ
Դեռ աղուհաց ունի ձեռքին:

ՎԵՐՋ

ԲՈՎԱՆԴԱԿՈՒԹՅՈՒՆ

ՏԵՍԻԼՔՆԵՐ 5

ՍԻՐՈ ՏԵՍԻԼՔՆԵՐ

Կեղևի բաց արա	9
Չկա	12
Բառը	14
Ջրերը կակաչներ են ուտում	16
Նա իմ հոգու անծայր տափաստանում պարող	17
Դու կաս, հիմա դու կաս	19
Ոչինչ չեմ հասկանում տագնապներից սրտիս	21
Ես ամեն օր քեզ հետ	23
Ես այստեղ չեմ հիմա	25
Կնքված է իմ կյանքը	27
Ես իմ մանկության հանդերին կանաչ	28
Սուտ էր տառապանքն իմ համր ու թաքուն	30
Մոռացման քանի պատճեն կա մեր մեջ	32
Չայները	34
Միակ սարսափն ահա	36
Կա հին մի տուն	38
Չայնդի անհունի կապույտ մի ծվեն	41
Իսկ ես մշուշներում քնած փոքրիկ մանուկ	42
Առավոտը դանդաղ	43
Մեղավոր էր հողը	44

Սերդ խեղդում էր ինձ	45
Լիլիան աղքիկ է մի փոքրիկ	46
Ճերմակ բարձերի խլության մեջ	47
Յուրտ ու մտերիմ	49
Ինչքան որ կա սեր	50
Քո լուռությունը հեռու և մոտիկ	51
Լողում եմ	52
Քո տառապանքը դու տարար քեզ հետ	54

ԽԱՈՐ ՏԵՍԻԼՔՆԵՐ

Անտուն ուղևորներ	57
Մեղուն	60
Անձրևից ծեծված, հողմից հալածված	63
Փղոսկրե անիվներով	64
Ինձ զարնան մի օր դրին անկողին	65
Ճալտերի կրծքից բվկոց էր գալիս	66
Ինձ մի թաքցրեք հովհարների տակ	67
Սաղվում է ցած	68
Երեկ տխուր, այսօր ուրախ	70
Ու զարնան հետ	71
Մեր խոհերին, մտքին տիրակալ է մի ձեռք	73
Եսեցին	75
Ես հիշում եմ ծովը	77
Ծառը ծառ էր ծնվել	79
Քամիները բուր	81
Ամպերն իջել ահա	84
Ճակատագրի դառնության միջով	86
Աշխարհը լիքն է կործանումներով	88
Ապակու մեջ ահա ծառերն են օրորվում	90
Ճեղքելով ինձ մուծի նման	91
Շունը	93
Գիշերվա մեջ կծերն իրար	95

Հայրեն՝ Մհերին	97
Ծուրտ էր կյանքը	98
Գեղեցկության ոգին	99
Մարտիրոս Սարյան	100
Ապառաժների լուռության վրա	102
Հայրենիք	104
Իմ ծուռ երգերը	106
Մեսրոպ Մաշտոց	107
Զրասույզ երկինք	109
Եղբերգ	110
Օրերն ընկնում են ձյունների պես	111
Մարդկային երթը օրորվում է ծուլ	112
Կապույտ ծառերը	113
Անհայտ, անանուն հոգսերի միջին	114
Քամին ծառերի չորցած կողերից	115
Անսահման անուշ քնքշություններով	116
Ձյուններն սպիտակ շրթունքների պես	117

ՊԱՏԱՆՈՒԹՅԱՆ ՏԵՍԻՆՔՆԵՐ

Ու վերադարձ	121
Ժայռերից անդունդներ են կախվել	122
Մեկը կանչում է ինձ	124
Իմ սրտում ասեղներ կան ցցված	125
Մեռածների աշտարակ	127
Եվ անապատի ավազների պես	129
Սփռոցների տակին պահված սեղանների վրա	130
Մեզ խոտոտ են տալիս	131
Ծիծաղի ճերմակ ամպեր են լողում	132
Մեր հոգիներն անլույս	133
Կանգնած չեն տանիքները	134
Պատերը պտտվում են շուրջս	135
Ծերունին ձեռքով խփում էր ժայռին	136

Աստղեր եւ իջնում	137
Եվ կատուներն իրենց լակոտների վրա	138
Թիթեռները	139
Փողոցների մեջ մեխված ձայները	140
Ես անհնազանդ մնացի դարձյալ	141
Յավի հատակին պառկած էի ես	142
Դեռ հոգնած էի	143
Առավոտն իր ձեռքը	144
Երկու հորիզոններ	145
Խավարի փափուկ ատամների մեջ	146
Անհայտ կորածի տանջալի հույսով	147
Մատներին մեջ ահա, մատներին մեջ	148
Կեսգիշերային խոր լուռության մեջ	149
Քրքրում եմ խոհերս ամենօրյա	150
Անդրաշխարհից հանած հսկա մի ցավ	151
Յուրտ լեռների վրա	152
Գետը խավարի շուրթերի միջից	153
Մի վայրկյան հետո	154
Անցած օրերը գիշերվա կրծքին	155
Քո շեկ մազերը ամփոփել ես դու	156
Մութը տրտմության պես կաթիլ-կաթիլ	157
Բաց, դուռդ բաց արա	158
Խոստովանանք (պոեմ)	161

Մեղրահաց

Խմբագիր՝ Լ. Ծ. Դուրյան
«Նկարիչ՝ Ռ. Ս. Զուլհալյան
Գեղ. խմբագիր՝ Աճ. Վ. Գասպարյան
Տեխ. խմբագիր՝ Ալ. Լ. Մարգարյան
Վերստուգող սրբագրիչ՝ Կ. Ն. Հակոբյան

Հանձնված է շարվածքի 27 IX 1972 թ.:

Ստորագրված է տպագրության 7/II 1973 թ.:

Թուղթ տպագրական № 2 70×90^{1/32}, տպագ. 6,25

մամ.=7,31 պալմ. մամ., հրատ 4,35 մամ.+1 ներդ.:

Պատվեր 2544, ՎՖ 07210, տպաքանակ 7000, գինը 51 կոպ.

«Հայաստան» հրատարակչություն, Տերյան 91, Երևան-9

ՀՍՍՀ Մինիստրների սովետի հրատարակչությունների,
պոլիգրաֆիայի և գրքի առևտրի գործերի պետական կոմիտեի
№ 6 տպարան, Երևան, Թումանյան փողոց № 23/1: